





省齋文藁卷第三十三

周益文忠集集三十



墓誌銘

靖州太守李君發墓誌銘

公諱發字秀實吉州吉水縣人曾祖宗應祖復父汝明
 贈朝散大夫母宜人彭氏初五世祖葬縣之赤石潭卜
 云子孫百年當有為二千石者大夫一日夢至潭上見
 巨鯉躍出驚波洶湧震動磯石旁有偉衣冠人笑曰發
 矣發矣未幾生公因以為名大夫既力學不遇刻意教
 三子長卓季植公其仲也幼警悟能文十四入郡庠遂
 貢京師兵興徒步還家已而重臣分鎮諸道客從者取

祿仕如拾芥公遊襄漢夔峽間數以奇策撼將帥獨落
落無所合乃復事科舉年未四十用太學連舉恩特赴
集英試補右迪功郎鼎州司理叅軍時紹興五年也公
素號通明加以精審比三年因無瘦死部使者言狀特
循脩職郎去攝邑黃陂調永州零陵令民稅久不均田
在左鄉率籍於右又皆寄產旁邑謂之僑戶豪民猾吏
相表裏賦役病焉令佐課常殿公始至命設幕兩廡下
人未喻公意明日召稅戶若有所訓曉者既畢集則分
寘諸幕使人自列產幾何稅安在不實聽相糾將根
株逋負痛絕以法實則肯汝又圍群昏於獄命吐其實

而叅考焉民與吏倉皇失措懼不相應無敢隱者即日
正田三萬五千餘畝爭訟既絕歲入大增課為一道最
秩滿陞右從政郎移柳州永興令境接溪洞民強梗難
治公恩威並施罔不畏服諸司以京秩薦者章二十上
改右宣教郎知贛州興國縣丁太夫人憂免喪通判橫
州攝守于賓二十六年詔監司守臣條具便民事公奏
交廣俗諉民男女易翠羽蠻中初猶一夫直十二羽今
僅得其半歲掠賣數百人多烹以祭鬼乞重其禁太上
皇帝惻然從之尋命焚翠羽於行都自是鬻人者息矣
轉通直郎二十八年改知貴州以疾求主管台州崇道

觀轉奉議郎明年為奉使金國書狀官進秩一等三十年擢知沅州轉朝奉郎今上登極改靖州轉朝散郎沅靖介獠夷控馭稍不至鴻張蛇結為害一方公撫以誠信興崇學校使荒遠悍戾之習浸淫教化咸帖：無事既合符吏上公履歷於銓部誤書年甲考功以聞有詔貶秩遂致其仕公怡然不以介意日與親舊樂飲絲竹歌呼窮晝夜不倦如是者累年：八十有一強健若五六十人與其兄黃髮相對怡：如也季早世則教育遺孤使有立鄉人服其友愛淳熙改元燈夕會客如平時已而微感疾癸丑遂卒三年十月丁酉葬於本縣二壽

鄉南岡之原初娶潘氏鄂州太守唐之女再娶張氏戶部侍郎運之媚皆贈安人又娶莫氏亦先公卒六子千里千秋千頃千得千言俱夭第三千乘今為迪功郎新筠州司法叅軍能世其家一女適右朝奉郎知邕州葛永慶再適奉議郎前知南安軍南康縣彭邦光有孫曰蟠女二人初公與今龍圖閣學士澹菴胡公同肄業鄉校其休致也胡公入佐冬官適奉詔薦士即上疏曰李某文采議論皆過人尤長於吏事三為邑五典郡然皆遐方僻地未究其才上官數交薦今雖老尚可治劇未報有諫官者乃以是咎胡公胡公坐去國猶念公不置

移書責當路云諸公皇：布駿骨而使老驥伏櫪耶嗚呼士大夫視時向背不肯犯嚴出薦口聞胡公勇為義篤於舊而不以進退二其心寧不愧哉他日乘以其從兄靖州教授誦之狀遠來求銘予謂胡公知公如此乃近舍皇甫何也乘曰得胡公銘我先人之名固可不腐將如胡公之德不著何屬之子則併著矣某曰然為之銘曰

謂公弗遇耶則仕盈萬石矣謂公弗壽耶則年開九帙矣而縉紳鄉閭猶未免乎哀窮悼屈者以祿雖豐未究其用齒雖宿猶猶裕于力也雖然自^古才能之士

固有厄窮不沾一命短折冠於六極者矣公何戚哉公何戚哉

靖州推官張君廷傑墓誌銘 淳熙五年

公諱廷傑字漢卿姓張氏吳郡人曾祖政祖奭父憲錢塘尉母余氏累世同居鄉里義之漢卿少業儒未冠而孤事叔父烏程尉士能任其家政勤勞弗懈歲時親賓會集漢卿必冠帶侍側翼：如也烏程既沒漢卿薄貲產均畀其子姪無毫髮私人皆咨美起家迪功郎靖州軍事推官非所好也卜居城中之花橋用所以事烏程者齊其家內外整：群從多饒於財漢卿獨刻意教子

藏書數千卷士大夫喜從之遊漢卿亦好客不倦也州西三十里有華山：腹有大池圖經云嘗產千葉白蓮漢卿鬻得之日課僮僕剏別岩竇疏導泉流創亭榭十餘區環以佳花美木四時皆有奇觀戶部尚書孫公覲為之記遂為吳門絕景漢卿既葬其婦山中又自為塚舍日往遊焉生事皆置不問人多笑其迂然漢卿心自有餘雖不作潤屋計而伏臘猶給無求于人既老預治棺槨衣衾曰吾宗鮮登中壽我則過之瞑目無憾矣淳熙三年五月疾革精爽不亂惟以和順力學勉子孫甲子遂卒享年六十有六娶李氏左朝請大夫通判廣

德軍寬之女先十七年卒五子長聖任早預鄉薦繼入太學為學諭次聖清皆前死今日謙曰願曰復謙亦太學生謹愿有父風五女長適承議郎簽書南康軍判官廳公事蔡瑀次適文林郎新知揚州江都縣李安上早世次適朝請郎新知南恩州楊挺二尚幼孫男五人鎬錡銓鏞鏜女三人謙等以明年十二月壬午葬公華山實與李夫人同穴蓋吳縣長洲鄉也昔外舅浙東提點刑獄王公葆光娶公娣兩家情好久而益洽予以是與漢卿往來三十年乾道壬辰予自小宗伯奉祠過平江徧游城西諸山漢卿時載酒邀予自靈岩入天平遂登

華山訪古道舊為笑樂最後置錢虎丘酒闌悵然曰某
老矣再見恐無期他日尚誌吾墓予曰公尚強健何遽
及此後三年予還朝復與漢卿通問無虛月又一年而
漢卿卒其子以監察御史潘公緯所書行實來求銘予
其忍辭銘曰

人生斯世孰能無求晉楚之富金張之侯無以收之
其樂也憂表：張公不膠不流治生求官與俗沉浮
他人營：已常休：有琴有書賓燕綢繆有子有孫
弦誦優游生無欣戚死何怨尤華山之原樂哉斯立
勒銘紀之名與山留

秘閣脩撰湖南轉運使蕭公之敏墓誌銘

淳熙五年

公諱之敏字敏中系出梁蕭氏五世祖自豫章徙居江
州之湖口曾祖昇妣譚氏祖仲山妣徐氏考固業儒而
不求仕惟牧：教子後贈朝奉郎母安人彭氏少好學
有濟時之志李成剽九江係累齊民如貫魚公亦被掠
以書生獨免繫會夜賊醉寐公密拔其刀斷民縛縱遣
然後遁去時猶未冠人皆竒之登紹興十二年進士第
補左迪功郎蘄州廣濟縣尉未赴辟襄陽府司法叅軍
府捕強盜陳大漢等十三人不獲鄉民群行適符其數
巡尉執送官不堪笞掠皆誣伏公約法疑之白帥移獄

已而楚州獲真盜闔府嗟異戶部尚書張澄吏事精明
禮部侍郎陳桷號醇正相繼來守屬吏奉承不暇惟公
遇事爭辨不屈桷常曰司法突兀長身他日真御史也
自是有蕭御史之名二十年用薦者陞從事郎知歸州
穉歸縣：產椒漆蜜蠟部使者科買無藝公一切拒之
境有龍湫洞歲旱群禱雨不應公禱輒應民號知縣雨
循文林郎調建康府觀察推官舒州惡少張天錫父子
五人夜投宿僧寺僧不敢納天錫踰垣殺僧屢鞠不承
遷延數年株連者多死詔江東選官鞠治公至天錫即
伏辜武臣梁俊彥獻議增沙田蘆場稅詔同金部員外

郎莫濠按視勢敵張甚至叱責轉運使公不為動稅以
不增金陵大府貴游子弟多在焉又常守以大僚郡事
綱舉而已幕職曹掾官日夜縱飲歌呼往：踰越法度
諸司畧不孰何公獨介然居中時歲切之受納秋苗例
別給餐錢公謝不受守固謂公毋妨他人公盡以脩官
廨戶部尚書韓仲通以法律進其居守也御僚吏嚴甚
無敢可否事民有刃傷盜桑者盜投繯死吏當其主故
殺獄已具公抗執不書仲通初大怒已乃薦公改秩時
公在選調踰二十年未嘗求之於人將代舉將猶闕府
僚數十人列誦其賢于留守樞密王公綸王公為成之

改左宣教郎知興國軍大冶縣三十一年完顏亮渝盟
上司籍民為兵日役數千人冒雪植暗椿鹿角寨為防
江計公度不足恃徒困民力亟請散遣上司不能奪明
年兵解以疾去官隆興改元復知建寧府建陽縣邑大
難治自政和以來閱五十餘令終更者終七人公至務
以禮義化其俗民翕然順從至繪像刻文紀公善政乾
道元年轉奉議郎未幾賜五品服三年選為幹辦行在
諸軍審計司未上有詔舉御史大臣以公名聞五年四
月召對便殿論正風俗上曰正風俗當何先公曰仁祖
時朝臣以危言讜論為忠偷合苟容為恥故風俗醇正

崇寧大觀而後反是在陛下示之好惡耳上曰誠如卿
言明日除監察御史六年轉承議郎七年六月輪對言
人心之於國猶身之元氣今欲土疆其本在結人心譬
之良醫治病必先護養元氣乃可攻疾此非書生空言
孫吳論兵亦出於此上曰所謂一日道而孟子亦云不
嗜殺人者能一之又乞減冗費省冗兵上皆嘉納八年
正月秀州華亭捍海堰成命公按視公還奏縣之四鄉
鹹水壞田乞蠲賦稅三年上從之三月臺諫官皆坐論
執政奉祠去上以公分察歲久見謂直諒擢拜殿中侍
御史公感激思報為上言治亂安危由言路通塞願備

其官假以事權毋使風采消沮又言前歲浙西夏滂秋旱江湖淮南歲比不登民多流離今正陽之月天多沉陰寒氣慘慄是謂常寒側身脩行茲其時矣因繳進富文忠公熙寧初奏議上曰富弼所論誠實有愛君憂國之心公知上聽納即疏言漢災異策免三公今宰相名任恢復實為持祿保位計燮理乖方既不引咎聞人言災異輒肆怒罵陛下昨許六察言事今乃令求實迹專務蔽關聰明二三年來莫敢言其失併條奏擅權不公等事上曰卿所論甚當可謂稱職于是宰相上章請去縉紳喜曰鳳鳴朝陽矣會宰相復留乃除公直秘閣提

點江東刑獄制詞有剛方不撓質直而明造膝之辭有犯無隱正人去國豈朕所欲之語蓋在職終四旬所論如此直聲遂聞於天下既至江左郡守多要官公舉刺各一人上皆罷行之所部肅然淳熙元年轉朝奉郎召為太府少卿公奏臣奉使無補何以復召上曰思卿直諒耳公奏提刑並置文武非是互用一員足矣又論經總制錢及額則賞是誘其求增羨也請罷之又奏諸路水旱頻仍今歲僅得中熟而七月錢塘風潮壞堤岸居民死者數千人災異在遠尚不可忽况都門之外乎又九月壬子距立冬總數日雷晝夜發聲亦非休徵惟益脩

德政轉禍為福上曰卿直諫之氣殊不衰未浹日兼權禮部侍郎進司農卿明年三月遷國子祭酒太學之士以得明師交相賀先自職事闕請托紛然公籍校定優劣升補先後為之格遇闕則察行藝次第而授奔競頓絕舊制職事官例牒宗族補試是歲公自以長官臨蒞令二子毋得入其後學官子弟中國子生者皆駁放始服公之先見頃之諫官論職名不當輕授公適引疾求去八月以本官提點浙西刑獄陛辭奏曰周公作無逸大槩言畏天恤民和衆勤邦儉家省躬罪已有容德具此八善自然保壽無疆今會慶節不遠臣當需次阻奉

萬年之觴願以此言為獻又乞禁止外路獻羨餘又錄蘇文忠公治道篇以進曰陛下既常置軾文座隅更願熟復此篇以發聖學上皆稱美相與論無逸蘇文數百言三年改除湖南轉運副使道州江華縣稅重民瘠大軍錢三千緡上供米八百餘斛力不能辦公奏免之四年上以公舊嘗帶職超進秘閣脩撰官吏畏公之正爭檢身恤下湖湘之民陰受其賜不可詳公方厲志澄清欲徧行郡邑而病日侵上書丐祠得主管建寧府武夷山冲佑觀勅牒未至以八月丙戌卒於官舍享年六十六訃聞致仕恩外特用前郊恩又官其一子益異數也

士大夫識與不識皆太息鄉人至出涕相弔六年正月
壬午葬於彭澤鄉加堰里小桂山之原娶同郡項氏天
裕之女封安人生三子長曰穎前卒穎碩皆能世其家
穎復以官遜其兄之子四女長適迪功郎筠州司戶叅
軍李景範次適進士張元觀次以疾居家次適鄉貢進
士曹彥約孫男四人必誠必簡必聞必蕃女三人曾孫
男一人公剛塞強義自其天性處心積慮公而不私平
居聞時政之善若賢才進用輒懽欣贊美不啻如己有
得至遇姦邪欺誕之人直欲折其頭角身之去就禍福
弗計也所至以廉介稱一毫不取諸人其自奉有布衣

所難能者當官毅然如若寡合及與人交表裏殫盡終
始如一遇觴詠從容時溫乎可親也素無嗜好惟聚書
至數千卷讀之不倦每見歷代及本朝名卿奏議剴切
平正者輒三復慨嘆恥躬不逮尤慕司馬文正公之誠
實蘇文忠公之議論二書手不停披暗誦率數百言樂
為晚進道之其後正色立朝不諂不瀆淵源蓋有所自
紹興末都民望為右正言公移書司馬公倅并州猶上
儲議且以告諫官范蜀公今足下實任言責事有急於
此者乎民望欲薦公會卒侍御史周榛又欲扳公入臺
復以他遷不果晚受上知自謂可行所學不忍用細故

塞責彈擊自宰相始上深察其忠顧勢不兩立姑聽外
補未幾竟易相召公歲中數遷而公病不能留旋齋志
以沒豈非命與初公仕不逮親故於同產尤極友愛常
分俸給二娣力教弟之美後亦登進士第今為奉議郎
知蘄水縣公雅留意於易博問精思所得深遠暇日喜
賦詩未第時都昌宰郭彥叅尉李鵠頗工詞章與公相
琢磨詩名遂著公沒二子既哀遺文為二十卷復以蘄
水君所狀遺事不遠千里謁銘於予：昔分教金陵實
與公同僚方他人游戲相追逐公必過予清談終日于
今蓋二十年中間雖同朝者再而無前日之款矣聞公

云止殄瘁是悲豈特公舊而已哉銘曰

維昔陽城安貧篤學振迹言路鳳鳴諤：乃官成均
士化端慤乃刺道州聲隱衡岳天生斯人艱矣難數
侃：蕭公文敏而樸或塞或通守道彌確礪兮其清
蛻於衆濁以配前修誰謂其邈銘藏諸幽亦詔後覺
朝請大夫致仕賜紫金魚袋黃公子游墓誌銘

淳熙五年

公諱子游字叔言系出浦城黃氏號閩中著姓五世祖
元吉事江南李氏有詩名生全州司理叅軍觀登大中
祥符元年甲科司理生太常博士孝先楊文公之甥尤

深於詩蘇文忠公所謂一唱三歎者也亦以進士入官
所至輒平反疑獄卒官博州貧不能歸卜葬陳之宛立
尚書左丞蒲公宗孟誌其墓子孫遂家宛立後贈銀青
光祿大夫于公為曾大父妣建安郡夫人章氏銀青生
朝散郎知穎州贈通議大夫好謙與二蘇同登科通婚
姻蘇公謂孝友如曾閔者娶陳氏章氏皆贈碩人穎州
生承事郎宰崇寧星變應詔上封事極論左右蒙蔽宰
相蔡京切齒劾以誣罔不道逮付御史獄長流海島紹
興初特贈直秘閣累贈右金紫光祿大夫即公之父也
母大寧郡夫人章氏公積厚源遠鍾美聚粹以慈祥之

性濟明敏之資少從伯父待制實蔭為假承務郎金紫
之就逮也兄弟訟寃于朝乞納告身贖罪權臣滋怒公
號訴益力父得不死由是知名大觀三年八寶恩循登
仕郎調相州儀曹郡僚負官錢六百萬守委公拘係公
哀其窮縱之使逸守義之為蠲其逋建炎初客南京歐
陽澈以上書忤宰相棄市公適同邸收而葬之其子飛
英年十四公傾囊輟所乘馬贈其歸棟州軍亂殘通判
邵某家而誣以謀反邵子在鄉懼有後命公為白其寃
于本道轉運使竟官其三子未幾版授穎州汝陰令時
軍需繁挈雖許預借夏稅而歲迫暮不能辦縣帑貯和

買錢數萬緡公欲發之郡守不可公乃召民諭之曰某
戶當受錢買絹若干今計汝所輸夏稅留錢而給鈔汝
歸徐以絹來公私大以為便守下其法於諸邑四年避
地歸閩道由嚴州之朱村土豪守險者臨公以兵老幼
駭竄盡掠其貲事定太守柳約將以軍法窮治公力止
之朱村人繪像以報紹興元年入監左藏西庫車駕自
紹興移蹕臨安公請銜命先渡江經度臺省倉庫所寓
畫圖以進後皆不易權度支郎官丞相呂忠穆公都督
諸軍擢公江東轉運判官兼隨軍轉運副使以勞陞進
秩一等公諉功同僚俞侯亦進秩人多其遜會安撫

使與公有憾甲密奏公之興罪且不測叅知政事沈公與
求曰詎有方被賞遽曠職者且軍前無奏而他司僥言
必讒也已而果然猶坐奪一官會江西新羅劇盜朝廷
知公仁恕選提點本路刑獄未赴改知台州徙池州台
產鹽池產茶姦毗囊橐其中重法不能禁公治以輕典
人不忍犯在池二年獄無重囚屬縣曰青陽偽唐以為
宋齊立食邑後因田租立稅額其重十倍公代還奏曰
國家涵養斯民二百年矣忍使青陽獨用李氏弊法乎
詔裁其半民為立祠奉事至今久之求浙東安撫司叅
謀官以歸自是主管台州崇道觀者五稔遂致其仕積

官右朝請大夫賜服金紫以乾道三年十月三十日卒於正寢享年八十有八娶武氏左正議大夫珣之女先公三年卒初公卜壽藏於鄞縣豐樂鄉金鵝山是歲十二月九日與武氏合葬焉三子仁傑右文林郎監臨安府軍資庫仁儉文林郎新處州青田丞仁脩從政郎南康軍錄事叅軍孫男七人直與終迪功郎直清將仕郎直己直益直行直愛直正女二人長嫁進士吳鐸之次許嫁進士陳經曾孫男女各八人公家傳孝友勇於義而安於仁處事未嘗動聲色而曲折中理所居官咸可稱道靖康之^亂挈內外族姻數百指展轉兵間以身任其

寒飢晚卜居明州奉化縣築聽雨堂橋隱齋兄弟四人華蘊相從歲時燕樂孫曾滿前百順具備官簿當選置而不言遇大禮捨其孫而官猶子又竭資以嫁兄之諸孫閨門雍睦和氣可掬下至奴隸亦得其歡心尤善與人交親疎一接以禮大夫識與不識皆稱公為長者丞相張忠獻公每對客誦言颺歐陽事以為今無此人矣公感知己歲遣介問忠獻公於遷謫中其忠厚大率類此公既沒十一年三子惟仁儉在屢以承議郎王度之狀來請銘惟某族姑歸公兄之子仁術蓋依公以居者故不待識公而知其行義詳矣振宣幽光宜無愧辭銘

曰
浦城之黃世有君子公承以仁允謂濟美祿雖不多
而壽則遐嗟爾後人益保厥家

省齋文稿卷第三十三終

省齋文稿卷第三十四 周益文忠公集三十四

墓誌銘

直敷文閣致仕魯公嘗墓誌銘 淳熙五年

紹興初魯如晦季欽兄弟問學詞章一時競爽名卿毘
陵張公守胡公世將爭為延譽或比之二陸已而同奏
名禮部別院既仕各以議論才術自見為郎為卿為郡
守監司職業交舉天子噐之年至先後掛其冠里居康
寧瀕八十乃終洪範五福蓋庶幾焉乾道中如晦沒季
欽屬予銘其藏季欽之葬也二子復以為請何可辭公
名嘗字季欽世為秀州嘉興人徙海鹽之武原曾祖延

厚祖惟辨父贈正議大夫壽寧妣碩人劉氏公起家左
迪功郎臨安府餘杭縣主簿以正議年高求監潭州南
嶽廟未幾遂丁憂免喪爲廣德軍教授陞從政郎時宰
有雅故公不深求僅得台州教授用薦者改宣教郎知
衢州江山縣爭訟數十年不決者公曉以義理多感泣
愧謝縣舊科糴本乾薑羊錢歲二萬緡二十六年有詔
蠲免而州家用不足別取之民公經畫權酌以其贏代
橫歛公私便之守言諸朝下其法他邑遷奉議郎大宗
正司主管財用分治於越三十一年明堂赦恩賜五品
服上登極總如晦主管官告院請覈空名告身在諸軍

者冒濫頓革擢國子監丞未上改太常丞隆興二年冬
召對論人主當法堯舜及言文武未盡其用百司不守
法度天語稱獎拜監察御史公以左相陳文恭公叅政
錢公端禮姻舊固辭上謂二公曰嘗朕親擢何辭二公
言典故不可違欲用嘗豈無他官乃改吏部員外卽是
歲浙東西水災民大飢疫詔郡邑賑濟選卽官察之公
使浙西所過發倉廩人：被實惠具施行次第歸報又
陳荒政六事上甚嘉納特遷一官嘗攝右史侍立上頷
左右稱其儀矩凝重且有端人之目俄進太府少卿輪
對及治道機要上曰卿老成今處司府凡事宜盡誠退

即條奏文書牴牾事上諭宰相如魯嘗留意職事何患不治兼權大理少卿公益感激奮勵遇事可言不以非其責弗言如論海道備禦蕃舶事宜絡錢會子輕重相摧催科網運致弊不一咸得要領至言徇私植黨請謁交通辭尤激切會舉行出入更迭之制公在卿寺蓋二年矣首請補外除直敷文閣江西轉運副使所部適旱詔趣行隨以璽書詢管下雨澤何如公夙夜布宣上德歲以不歉作卷兩樓于廳側自為之記本道上供米九十餘萬斛歲費錢十餘萬絡造運舟于贛吉其來已久使臣綱稍積習侵盜甚則鑿舟沉之大率數年輒欠三

十萬斛惟江表興國建昌四郡專募客舟未嘗損也公具以聞詔官舟客舟均用須歲終較其利害徐議更制公乃捐枋木錢助諸州雇舟又蠲民間水脚錢十一萬緡即漕臺置艘二百條其闕而贛吉船塢遂罷徙浙東提點刑獄公事又徙閩路公已倦游力請奉祠得主管台州宗道觀遂致仕積官至朝請即公之自廣德婦也大闢園圃手自種植名曰日涉至是殆三十年木皆成陰亭榭增葺公日從容其間歲時釀酒會賓客鄰里以爲笑樂名士多賦詩美之淳熙二年八月十日以微疾卒前三日猶秉筆作文臨終精神不亂其所養如此享

年七十有七先娶陳氏朝議大夫正原之女繼室以其
媚益忠肅公族也再娶曹氏武惠王之後亦前卒皆贈
恭人三子可宗登隆興元年進士第後又中博學宏詞
科終脩職郎南外敦宗院教授人皆惜之可群迪功郎
監潭州南嶽廟可舉將仕郎五女長適朝奉郎知德安
府周頡次適迪功郎監秀州支鹽倉陳綱次適國學進
士胡懷祖次適迪功郎廣德軍建平縣主簿葉巖次在
室孫男五人符籥筌策節孫女八人長適迪功郎監行
在編估打套局門黃聞餘尚幼曾孫男女三人初公卜
地於湖州武康縣慶安鄉後汪村之原規畫兆域旁築

息菴隨一相堂環以松竹扁舟時至其上公既沒二子
奉樞以葬益四年三月二十日也公力學強記年十二
下筆驚人入京師太學每從儒先質疑義聞見日廣刻
意古文耻作蹈襲語下至尺牘亦可觀喜論天下事廷
對述安危治亂邊防形勢甚備兩上萬言書極陳利病
當官務行所學必欲事：辦治平居喜稱人善而覆匿
其短貌莊氣和輕財重義勤於接物少老如一著述有
易說二十卷論語解十卷蒙溪已矣集四十五卷後集
二十卷須江雜著六卷會稽酬唱二卷芻狗集十卷菊
菴編十卷南征錄二卷自警錄四卷編集祖宗訓典五

十卷編注杜少陵詩十八卷又年譜一卷昔予攝承詞
掖公由會稽入朝袖詩數十篇為贄格律高妙予竊敬
為其後公持節按行廬陵遠訪予于郊野自是問訊無
虛歲情好滋洽非特以葭莩之故也既序公出處又系
之以銘曰

降才本天	成之者人	如彼良疇	勉其耕耘
歲有飢穰	我無阨貧	敏乎魯公	能濟以勤
既裕于政	亦昌其文	既食其實	亦彰厥名
有始有終	以沒元身	肇營新宮	山環水縈
生樂斯立	死反其真	我為銘詩	式穀雲祲

武昌簽判尚宗簿大伸墓誌銘

淳熙六年

公姓尚氏相州安陽人世以武勇聞左金吾衛大將軍
贈本衛上將軍諱從諫者公之曾祖也生二子分習文
武業其一掌麟府軍馬號名將其一以累舉入官贈大
中大夫諱槩者公之祖也父諱佐均博學工文章登進
士第歷校書郎禮部郎官國子司業祭酒終朝請大夫
直龍圖閣後贈某官亦生二子長大倫終迪功郎公其
季也諱大伸字長道以父任為將仕郎紹興五年補右
迪功郎監西京中嶽廟版授臨江軍新淦尉調吉州司
戶叅軍用新淦捕盜賞改承務郎權知贛州安遠瑞金

兩縣又權筠州之上高皆用治辦聞以母夫人杜氏年
高求監饒州景德鎮視事不一月丁杜夫人憂時二十
五年七月也服闋知贛州寧都縣賜緋衣銀魚秩滿簽
書威武軍節度判官廳公事西外宗正簿又佐武昌軍
淳熙五年閏夏大暑人多病癰疽公亦瘍發於背庸醫
妄投藥再旬不瘳公志氣安定手書後事諄：七月十
六日坐而逝得年六十有二惟吾伯母實公之娣靖康
兵亂公年尚幼依伯父入蜀亂定來江南伯父謂我女
兄早孤而賢命婦公重兩家之好險阻艱難殆三十年
共立尚氏之門戶是生四男振祖振英振搯振德女長

適從事郎田掾次適將仕郎羅尚賢次在室餘天公自
為兒童侗儻有大志遇事智略常出人上少長氣貌瓌
特議論宏偉未三十即治劇邑吏懷姦欺來前輒迎毀
其機牙咸懾不得發頑民屏息善良吐氣推心腹待僚
佐有不合面折之已乃懽然未嘗虞其怨也性不樂軟
熟媚耳目每與上官辨曲直爭利害坐是抑厭不進益
懷竒負氣閉門讀書晝抄夕校忘寢廢食聞有與編隱
帙百方求之以故博古多聞所至屈其坐人尤嗜資治
通鑑編類數四往：成誦有來問者應答如流平生喜
劇飲當酣適時談諧貫古今志意薄霄漢聽者欣聳雅

工詩下筆滾：數百言其豪邁慕李太白精博學李義
 山而思致綿麗又效温飛卿至其得意處自謂不減古
 人今有家集十五卷和陶詩一卷存焉初公以宣和六
 年補官五十年間輩行皆至大官公終為承議郎當上
 考功課進朝奉階延賞於後乃不能待然公苦心教子
 家四壁立縮衣食之奉招致館客又躬督其課程夜以
 繼日振英已嘗舉於鄉矣詎知造物不使諸子益奮于
 學自致名宦寧失於此將得於彼耶公輕財重義周急
 不計有無雖甚珍愛之物人或稱美與之無吝色身後
 僅餘圖書好玩數簾而已歲在丙戌女兄即世公即卜

地於吉州廬陵縣其鄉之原置雙穴焉一星終而公歿
 諸子乃以是年某月某日敬承治命奉柩合窆遠來求
 銘泣而銘之曰

太阿久押 用乃缺兮 驂騮久絕 進乃蹶兮
 命實制之 非我拙兮 生雖有涯 名不可滅兮

恭州太守任君續墓誌銘 淳熙六年

君諱續字似之潼川郫縣人系出漢廣阿懿侯教懿後
 十六世為晉安東將軍顯：九世為隋潯陽太守壁謫
 掾閩中以死子孫因家焉壁生頤：生業：生雅相：
 唐高宗其曾孫畹疇皆達官太和中詔以二龍旌其里

畹生椿嘗叅梓州軍遂徙鄴之興城椿生韜符韜符生
宗誥宗誥生琦：生仲簡仲簡生伯傳登景祐五年乙
科仕至尚書都官郎中是為君之曾祖都官生庾終普
州司理司理生忠原終朝請大夫知黎州君之祖與父
也文獻相承衣冠不絕蜀人論氏族者推焉君少以父
任為將仕郎父疾革戒君曰興城之任世以儒科顯爾
不可忘命易今名字君泣拜而志之紹興七年起家為
漢州雒縣尉十三年又尉昌之永川夙夜銜父訓懼從
事不能卒業十九年求監潭州南嶽廟二十一年遂中
進士第選澧州：學教授晨策羸馬從一僮謁守丞退

則繙校遺編盡日與聖賢對他無所問當路交薦二十
八年自承直郎改左奉議即復求開州教授而去隆興
元年就遷夔路轉運司主管文字朝廷歲縻緡錢數百
萬市馬川陝歷梁洋下襄郢山行險遠道斃之餘至臨
安者皆骨立有大吏請治舟峽中乘漲水載馬東下既
駛且安詔從之無何官吏奉行弗虔效牽者又加迫促
資糧芻粟篙師擢夫一切取辦於民急若星火州縣大
擾乾道二年春君適還朝上疏言請調他道禁旅分屯
夔峽代民駕舟事已教閱如故異時荆楚出師北伐亦
可為上流聲援召對下其說君因論三事曰大臣雖罷

政猶當體國安得苟自便安宜使分守邊要漢部刺史
察舉二千石今監司專繩小吏夔鹽惡而直倍漕數州
州縣：計口抑民瘡痍一道上嘉納之擢守涪州未上
易恭州四年春蜀大旱常平義倉素空竭姦氓姚京給
言官廩有餘誘致四方流冗冀以挺亂君知其謀既按
京抵罪即捐俸錢五十萬募民入粟闔境爭勸趨之饋
粥廬舍規畫有序至者如歸帖：無事壁山有淫祠民
病輒^解牛以祭君下令禁止訛言神云守奪吾祀民與
牛皆將疫死郡人大恐君知廟巫實導之^捕係郡獄巫駭
服巴縣令貪虐君劾去之其子飛謗于朝言者因論君

前議舟師為迎合八月罷郡事六年夏主管台州崇道
觀命至而君以疾卒於左綿實九月戊子也淳熙丙申
冬葬仙雲山之下得年五十有七積官左朝奉大夫君
靜重廉介篤學喜為文身修家齊勇於為義嘗傾產以
調娶媢教養孤甥迄有成立仕宦三十年先疇一無所
增身後妻子假貸以斂君凡四娶二李氏鮮于氏皆贈
宜人今夫人王氏御史利用之女有賢稱子男七人義
山興元府西縣尉義問義路義舉義端義明義正女三
人一嫁文林郎馮適之一嫁進士鮮于糾宗一尚幼所
著書號仙雲集者二十卷又有任氏春秋十五卷春秋

五始五禮論五卷篆隸石刻譜三十卷歲戊寅冬十月
 君調盛山教官過金陵予分教在焉以同年進士置酒
 道舊見君氣貌瓌偉議論慷慨意其將為世用孰謂君
 止此也比歲識其子義問于行在所博洽能文與篇隱
 帙問無不知君可謂有後矣任氏其興乎義問將還蜀
 出石泉太守章森狀君之行實乞銘于予義不可辭銘
 曰

謂君窮時既逢謂君通志弗克德之洪報也豐劬爾
 躬後其隆

朝散大夫直秘閣陳公從古墓誌銘

淳熙十一年

自古有志功名之士常患其才無以高世才高矣未必
 逢其時：逢矣未必皆為主知幸而見知則摩九霄撫
 四海非難也然而將起輒仆未耄遽沒茲非命與嗟吾
 希顏不幸乃如此交友聞而悲之况予先大父與希顏
 之大父為同年進士予又綴名希顏榜中在期集所日
 日相從間雖出處不齊而愛契厚矣晚預政中書每聽
 玉音論當世人物必才彥顏顧不能悉力薦引使以所
 長大顯于世則夫悼惜愧喑豈止同乎眾人而已今其
 仲子縑經來告曰先君葬有日不肖孤捨几筵而銘是
 求成遺志也將紆予悲不在茲乎乃序而銘之希顏姓

陳氏諱從古系出漢文範先生文範生諶：生忠：生
佐：生伯珍晉建興中渡江居曲阿新豐湖即今鎮江
府金壇縣境也故君為金壇人曾祖廓熙寧九年進士
仕至朝奉大夫利州路提點刑獄事祖瑛登第在元符
三年終文林郎知真州揚子縣父維婁貢禮部竟以特
恩入官主信之弋陽簿後贈朝請大夫君天資雋敏兒
童時應對賓客有成人風稍長自力于學為文辨麗閱
壯儒先交舉之紹興二十一年中進士第弋陽府君喜
曰世業有傳足深吾耻調臨安之富陽尉秩滿用賞改
左宣教郎為邵州：學教授殿中侍御史張震議拔君

入臺會遷中書舍人而止入監左藏東庫未上丁弋陽
憂免喪監行在權貸務都茶場丞相虞雍公問君終歲
出納幾何君曰國家利源醜茗居半自合同關子行遂
虧常額丞相命君即都堂條救弊之策于是關子罷而
歲入增矣都城浚運河丁夫輦泥積務門君爭曰隙地
以遠火災室之可乎尹恃勢弗聽君朝衣坐泥中上聞
之夜半為降旨禁戢已而車駕閱武近郊君進詩五十
韵姓名益簡上心命措置浙西監事以勞擢司農寺主
簿坐法免旋起知蘄州赴闕奏事上曰卿書生能通世
務昨宣力務場為多獎勞久之到郡期月上以湖南歲

比不登選君提點刑獄始至衡陽民有被誣以淫祠殺人者更三赦不決君奏釋之詔下而兩教官作平反堂記紀其事時乾道七年也十二月就除本路轉運判官以明年二月視事專任荒政蠲逋欠以萬計御札令同帥臣收養貧民所棄嬰兒君悉心奉行楚人德之夏秋復閔雨精禱嶽鎮遂大有年武岡徭人憑恃谿谷創立樓櫓議者欲以兵問罪君曰徃連不稔彼迫饑餓為保聚計耳今可文告定也遣吏鑄誥首長帖聽命其後長沙水溢穿城郭敗廬舍君督吏卒疏理池隍計戶給土木費人忘其災事聞復下璽書問狀併論賑濟功特

除直秘閣是冬京西謀帥上閱諸道監司姓名指君曰陳某有才無以易之九年正月開府于襄即奏言朝廷以襄為上游重地增俾益戍緩急許調鄂師善矣但節制不一莫知適從紹興隆興間嘗萃荆鄂兩軍於此分地以守東盡隨與棗陽鄂帥趙搏主之兩盡均州光化軍荆帥王宣主之權均力敵各行其說搏欲持重宣欲轉戰此不立統帥莫相臨制之失也今若合為一軍擇宿將為都統制屯武昌置副帥屯襄陽或一年許其更戍則號令歸一無敢首尾誤國矣疏入上適有此意四月乃用吳挺為荆鄂駐劄諸軍都統制而以王世雄副

之分治荆南其後荆南軍竟更戍襄陽至今以為便北
界有叛者來虜以兵壓境或請增戍受降君固執不可
揭榜境上示無招接意虜兵遂退上謂丞相曰從古倉
猝應變足銷疑沮之謀可諭此意以獎之淳熙改元復
坐論列而罷二年春主管台州崇道觀自是閒廢者九
歲上眷之不衰鑄錢使者嘗缺召君欲用之繼即其家
連畀衢饒秀三州印綬皆不果行君自知數奇願復食
祠祿朝廷為修廢官差主管南京鴻慶宮卜築洮河上
奉親教子之餘猶孜孜國事時有所見聞輒論著告于
有位鄉邦游饑周恤甚勤居閒好客酒後談論激烈聽

者忘倦自高曾以來世工篇什君及從呂居仁向伯恭
蘇養直游徃：得其句法尤愛陳去非詩取簡齋集盡
次其韻裒古今詠梅自鮑參軍而下迄近世名公得古
律千餘篇次第屬和豐腴清婉兼備衆體無支辭複語
駕幸秘閣君自以寓直其間奏百韻詩以賀詔與宰執
侍從等所進同付史館播紳以為寵九年秋以事如城
中八月二十日還至半途遇疾而逝於是母夫人譚氏
時八十六矣君孝而不得終養是尤可悲也積官朝散
大夫得年六十有一娶薛氏承議郎諸王宮大小學教
授璿之女嫁時年二十四逮事尊嫜孝謹知書宗族稱

賢再封安人前君九年卒追贈宜人五男子伯震從事
即監江陵府糧料院仲巽當以致仕恩補將仕郎叔謙
季益季咸未仕女適從事郎興國軍判官趙師沔孫男
女四人伯震等卜以十年十一月二十九日葬君本縣
唐安鄉茂城之原舉薛宜人柩祔焉其地介於祖考三
塋間銘曰

孝友以為質詩書以為輔科名世其家才術知乎主
天子希顏可謂厚其賦予矣既黼黻之又齟齬之竟
何取哉竟何補哉

省齋文藁卷第三十四

省齋文稿卷第三十五

周益文忠公集三十五

墓誌銘 墓表

朝請大夫知潼川府何君耕墓誌銘

淳熙十四年

公諱耕字道夫姓何氏世居漢州之綿竹縣曾大父杲
大父延世號休菴居士輕財好施食客日數十人與同
郡德陽史彬善以其子莘為彬壻即公之父也贈朝請
大夫彬教授弟子以百數號絕學先生兩家既通婚姻
何氏亦占籍德陽矣公甫勝衣從外祖學詞賦警敏異
群兒更授尚書殫思精義東西川名士張行成任愷繼
為郡博士皆奇之方弱冠類試奏名第一時紹興十七

年也自行在吳中蜀士不預廷試例賜魁進士及第命官視甲科第三講和後稍：來奉大對時秦益公當國諭禮部尚書凡不至者第一等並賜進士出身今後準此入熟畫可遂為故事蓋自公始以左迪功郎充彭州州學教授用舉主陞從政郎教授成都公天資高明積學勤篤士聞風四面至帥守監司交薦之改左宣教郎領職如故制置使沈介轉運周綰何逢原皆中朝名勝待公以異禮今上登極轉左奉議郎移成都府路轉運司幹辦公事官長查齋負才易公：遇其施設未安必反復告之齋大敬愛吏部尚書汪公應辰儒宗嚴許可

以文章典雅科薦公俄通判成都府乾道四年綿溪大飢公沿帥檄賑濟過家率族黨發私廩為之倡里富人獨閉糴公登門曉之弗聽械繫其家人遠近輸米相踵全活不可計文人晁公遡為提點刑獄詩以美之會叩蜀間盜發帥遣將：數百人命公督捕公宣示恩信譬以禍福尋即解散擢知蜀州撫摩善良繩治姦猾郡以大治盜復起隣邑州民驚擾公立木四門大書曰率眾劫民財者斬有村夫攫鬻物於市者罪當流部使者欲殺之且責公自叛其說公曰前令為率眾而劫人者設今一夫攫物耳非姑息也使者愧謝居頃之丁太宜人

憂疏食三年出居僧舍自號恬菴踣叟以布裘鉄環竹杖等五物為五友若無意於世者免喪踰年羗寇沉黎虞雍公為宣撫使檄公守雅州諸司調西兵來戍公曰蠻敢侵邊貪吏實啟之其患在外今多屯兵必損郡計脫不滿意且內訌是腹心之疾也守誠潔已奉公戒城寨官無黷貸生事訓練州兵優恤土丁蠻何足患其後八年黎境再擾制置司調戍兵益眾將非其人果作亂人服公先見知果州改嘉州課常為諸郡最除潼川府路提點刑獄公事作諭民詩四十二篇語平易而教化寓焉郡邑家有其書強暴犯法父老必譙曰汝不誦

何公詩乎往：知悔淳熙四年勅差監四川類試得士為多是歲被召明年入對論恢復四事且曰願陛下內定其志外修其具考其實無聽其虛言無畏難于今而成功於後日上曰卿所言盡之矣拜倉部員外郎改戶部郎中兼國史院編脩官侍講東宮未幾遷國子司業就陞祭酒改太子侍讀講禮記終篇及史院進四朝志皆增秩一等徙秘書監丐外知潼川府請祠未報以十年六月乙卯卒於州之正寢享年五十有七改詔公主管玉局觀不及拜矣積官朝請大夫娶同郡李氏封宜人前公四年卒三男德方將仕郎德彥迪功郎新邛州

司戶叅軍德固迪功郎新嘉州學教授三女德秀德珍德蠲適進士王瓘閔鎔李兌孫男七人居安慶傳遷僧卿月早夭今存者曰惠雲法雲登雲即其年九月乙酉葬於縣之義合鄉元池里與李宜人同域而異藏公有文集百卷藏於家予未嘗至蜀而多識蜀士夙聞公有盛名紹興末外舅王公葆守漢每道公之賢歲在戊戌予在翰林而公實來一見如舊交已而僚于東宮于史院予既知公亦知予自公云亡懷思不已今德彥德固同登進士第泣請銘公墓義不得辭竊嘗評公于書無不讀而得其要於文無不能而根諸理立朝端諒

敢言典郡豈弟人不忍欺其持心雖厚而臨事剛不可奪其造行甚謹至適性亦通而不拘當仕則仕當止即止惟其時而已矣始蜀先進久欲扳公於朝公未嘗有所就虞公秉政知公特深迄莫能致也趙沂公入相薦公為郎公積閱雖高然寄祿未至大夫為中郎滿歲乃可任子素友愛季弟憐其早世撫孤德崇過已子將命以官于是翻然而起至則忠嘉合上意譽望動播紳朝廷進退蜀士多以公言為輕重學省蓬山極道德文章之選公俱為之長視禁途跬步可登一旦悼亡浩然有歸志日夜求去人爭欲留公予時為承轄諒公誠慙莫

月益公集 卷之五
敢^能過也蓋公之行誼文學出處去就大略慕唐白樂天而耽玩釋氏躬持齋戒尤與之同嗚呼斯亦賢矣是宜銘：曰

珪璧其德松筠其節何以文之惟學與識宜公宜卿我則自抑宜菴宜期天曷爾嗇寧非劬躬以壽奕葉邈乎來今尚考斯刻

段元愷墓誌銘

紹熙二年秋

段氏自唐成式刺吉州後家永新至諱準者徙居郡城故為廬陵人準生居簡居簡生世臣族系駸蕃兄弟繼登科號稱儒家世臣生子冲字謙叔一上南宮不肯為

新學退築芸齋藏書數萬卷朝夕讐校自號潛叟郡以遺逸八行薦不就政和中太守程祈學有淵源尤工詩在郡六年日與謙叔唱酬其和梅花輾轉千咏人嘆其博所著書號螺川集多至百卷程為前序資政忠簡胡公作後序是生五子君次居三名元愷字達信儀表偉岸襟度坦夷始從進士舉值兵亂棄去輕財周急鄉里仁之遇有持論不公行已弗正者輒面折不少恕人更服其義忠簡公與謙叔有師友婚姻之契待君甚厚每觴詠必連旬暨予卜居城東與君為隣君長予二十五歲而精神非予所及獨慕品酒量均劣可相追隨淳熙

二年正月予赴行在所君來宿舟中飲奕達旦而別五年夏予在玉堂猶得其書是秋乃聞君以七月十一日卒享年七十有八後二年十月丁酉葬本縣儒行鄉橋井之原妻劉氏前卒塋相望也二子人傑世其家人鑑為季父鑠後孫男六人希尹希晏希說希周希顏希韓孫女三人長適歐陽興祖次適劉慶遠一尚幼初君疾華語其子曰胡公知我深今居里中必有詩文哀我銘則屬諸內相小子志之既沒其子以遺命告雖諾未暇迨一星終予奉祠歸人傑泣申前請乃為之銘曰
惟利與名逐：營：外物重焉在已必輕孰如達信

樂以全生尚論潛德庶幾天民

提轄文思院葉君楠墓誌銘

紹熙三年

君諱楠字元質其先合淝人慶曆中徙家池之貴池曾祖亶祖茂父蒼贈宣教郎母吳氏繼母程氏皆贈安人君力學早成登隆興元年進士第調鄱陽尉夏旱繼以秋澇君請盡蠲田租守難之君言境內蕩屋廬者七百餘家溺死百八十人流徙相望盜賊將起欲惜費得乎守悔悟減租十九江州軍帥苗定御下過寬士卒六七輩掠君所部君檄取數四不報君引古誼質責竟正其罪以繼母憂去官服闋注岳陽軍節度推官未上又丁

父憂終喪授邵州司法叅軍用舉者陞從政郎封州學教授地苦瘡癘三歲郡官死四十餘人君悉力調護其家割俸助之淳熙十年改宣教郎知徽州績溪縣統十鄉里正苦差役追擾君與約日受二鄉文書八鄉得番休力役不疲官事亦辦人以為便爭欲及君時克役其催科尤不擾民皆樂輸惟恐後訟牒日省君乃斥添給不受積至千五百緡大葺縣學買監書二千七百餘卷市良田三十六畝士民歌曰前有黃門後有葉君蓋蘇文定公嘗宰此邑也十五年轉奉議郎明年覃恩轉承議郎賜服緋魚諸司疏治狀有旨任滿審察上初

政首用君提轄文思院命下一日卒于旅邸十六年六月三十日也績溪士民聞訃嗟泣享年五十二是歲十一月十六日葬青陽縣北七里豐林之原娶汪氏封孺人子之真女尚幼君篤實勤敏臨事慷慨敷上書論天下事皆考證古今別白利害從政務行其言未嘗苟且平生喜著述有知非集五十卷精金訓鑿二十卷童蒙記十卷始乾道丁亥九月予舟過池陽庚寅與客騎遊九華道由鉄菴山中有華屋四山環合是為君家君之父置酒留宿見二子為長即君也方待鄱陽闕明日與予並轡至青陽又明日出郭西南行登雙練亭觀雙瀑

至上下雪潭宿協濟廟溪聲如大雨予與客踏石涉水
為戲獨君魁梧遂墜水中眾客大笑又明日登化城峯
謁金地藏塔訪龍女泉李太白書堂蓋九華最高處也
東下數里上龜山尤險峻君忘其勞褰裳相從詰朝由
慕善鎮入五溪旁距鉄券總數里乃別去自是無歲不
相聞庚子夏予與華亭錢公師魏同在政府師魏嘗分
教於池與君善共議扳君：徑從吏部調官封川予二
人既憐君遠宦又默嘉其恬於進取而愧不果薦進也
已而部使者爭舉君改秩又明揚績溪之政有列於朝
且用矣孰謂綬未結而纊已屬悲夫君之季綦繼登科

第狀君行實求予為銘予雖諾而未暇其嗣子不遠千
里訪予長沙垂涕固請何敢以老諄辭乃為銘曰

嗚呼：者車安行九折之途而僨乎四達之衢吾不知
其何如尚鍾美於遺孤以增光於厥初

朝散郎致仕郭公彌約墓表

淳熙戊戌七月甲午廬陵郭公卒于其子興國太守份
之官舍越明年冬十月己酉葬於吉水縣留田之原同
郡新廣東常平使者楊公萬里狀其行實教授鄉先生
端明殿學士澹菴胡公胡公為作銘傳信無窮興國曰
銘納諸窆懼無以表于阡乃斲石為方趺圭首走介入

都屬其以辭追念往歲扁舟過公於梅溪其地在臨江軍新淦南一百二十里亂山環合中時平行公始卜築氣象殊軒豁別創佚我亭為燕息之所屢求予作記予懶且病閱十四年未能成今公既沒若遂無一言是忘昔人掛劍之義矣其可乎惟公才甚高學甚勤志甚大惜命之不副方少時讀書為文已卓然不群意富貴可唾手取既齟齬無以自發則畫兵機數十策往撼岳將軍將軍竒之奏以官歷三任咸有績可紀已而歎曰徒勞耳掛衣冠而去是時興國已用家學第進士沓被堂選仕於四方公欣然就養歸則教督諸孫以餘力稍從

事田園然不求富也歲時醞酒烹羔與里父老游人有緩急輒赴之往來廬陵臨江兩郡間不可得而親踈士大夫甚貴重之興國既擢任二千石諸孫雋邁力學嘗再舉于鄉公亦連值慶典數進文階佩服煒煌福與祿俱年八十有二乃卒嗚呼如公尚復奚憾而予猶云：者蓋公平生刻苦專精凡六經諸史下至天文地理無不究其旨趣而又天資敏明遇事不苟博極世務識高而慮遠大欲為國家立功名垂竹帛其小猶將撥繁治劇行志於州縣二者適不遂故以仕學遺後人而身享壽考康寧之福較其得失雖未易輕重然天之生才常

艱幸而有人乃徒善其身及其子孫而無以施諸人識者莫不太息則予謂之命不副者不可也故表而出之以告後之君子公諱彌約字景聞其世閥爵里言行出處二公書之詳矣淳熙六年十月十日大中大夫試禮部尚書兼翰林學士兼侍讀兼太子詹事兼脩國史管城縣開國伯食邑八百戶其述

籍溪胡先生憲墓表

先生姓胡氏名憲字原仲崇安人紹興庚辰與其同為秘書正字原仲年長過倍予敬而親之原仲尤相愛每同舍退往留語竟日原仲自言少從其從叔文定公

同舍退往留語竟日原仲自言少從其從叔文定公

傳論語學時為予誦說以為入道之要也明年原仲上書論事求去天子待之良厚縉紳皆榮其歸官長玉山汪公聖錫合館職七人置酒道山堂以先生早賦歸去來之句分韻餞別又明年而原仲沒今蓋一世矣其孫親仁遠來長沙出門人秘閣修撰朱元晦所作行狀求表其墓凡其家世出處問學本末元晦紀次有法行遠無疑若夫懷思舊好尚論師友以慰夫慈孫之心則亦不得而默也自堯舜禹湯文武周公以道相傳見諸行事所謂師弟子之說固不必論惟孔子繼聖有作無時無位折衷六藝授之門人固嘗自謂文不在茲乎而

艱幸而有人乃徒善其身及其子孫而無以施諸人識者莫不太息則予謂之命不副者不可也故表而出之以告後之君子公諱彌約字景聞其世閥爵里言行出處二公書之詳矣淳熙六年十月十日大中大夫試禮部尚書兼翰林學士兼侍讀兼太子詹事兼脩國史管城縣開國伯食邑八百戶周某述

籍溪胡先生憲墓表

先生同舍退往自後竟原仲自言少從其從叔某同為秘書正字原仲年長過倍予敬而親之原仲尤相愛每同舍退往、留語竟日原仲自言少從其從叔文定公

傳論語學時、為予誦說以為入道之要也明年原仲上書論事求去天子待之良厚縉紳皆榮其歸官長玉山汪公聖錫合館職七人置酒道山堂以先生早賦歸去來之句分韻餞別又明年而原仲沒今蓋一世矣其孫親仁遠來長沙出門人秘閣修撰朱元晦所作行狀求表其墓凡其家世出處問學本末元晦紀次有法行遠無疑若夫懷思舊好尚論師友以慰夫慈孫之心則亦不得而默也自堯舜禹湯文武周公以道相傳見諸行事所謂師弟子之說固不必論惟孔子繼聖有作無時無位折衷六藝授之門人固嘗自謂文不在茲乎而

終有天喪予之嘆者以顏子既死曾子晚方傳道其餘則所得未深其器未大也馴至戰國異端浸起獨孟子能因師說僅續不傳之緒然諸子百家已復並行道術自是分裂至秦遂一掃而空之漢興諸儒稍習六藝之文而不知明聖人之道專門名家互相矛盾道德性命之理仁義禮樂之具視之蔑如又其久也雖訓詁章句猶且前無所承後無所授况其上者乎韓退之晚出於唐頗以師道自任終亦莫能救也天啟聖朝世與道興上而元臣大老信此道以覺斯民下而老師宿儒進此道以覺後覺然後人知聖賢事業本非空言間有搢持

或謬趨向或僻者相與辭而闕之縱未能盡得周孔之傳其視歷代從事末流失其指歸者固已不同乖離千歲庶幾復合茲非師友淵源之效與方其盛時伊川程公正叔之門從學者衆上蔡謝良佐顯道最為高弟以其所得授之文定公康侯而涪陵譙定夫授易學於程氏者原仲既傳其家學復往問易于譙：謂其學有不可以言傳特為原仲稍發其端原仲因誦所聞譙弗許曰心為物漬則不能有所見惟學及乃可明耳原仲退而求之久乃有得喟然嘆曰所謂學者克己工夫也由是自信不疑篤志力行以至于老中間可仕則仕必行

其道可止則止必致其義近而一鄉遠而四方皆師尊
 之于是元晦以先大夫之命事原仲如父既盡得其言
 行之美而又日進焉今遂為世儒宗豈無所自而然哉
 願予何足以知之姑述見聞附元晦所書之後使親仁
 歸併刻之以告來者年月日具位周某書

省齋文稿卷第三十五 終

省齋文稿卷第三十六

周益文忠公集三十六

墓誌銘 墓記

伯母安人尚氏墓誌銘

夫人姓尚氏世為相州安陽人故金吾衛上將軍從諫
 之曾孫大中大夫棊之孫朝請大夫直龍圖閣佐均之
 息女也生而淑慧長而柔閑族黨異之龍圖公以碩德
 鉅儒徧儀清綴崇觀典禮皆所是正夫人組紉之暇侍
 立左右繙經閱古間有裨益既及笄龍圖公方為少司
 成妙選儒流將作之合謂我伯父辰陽府君諱利見文
 學行義蜚聲上庠故以歸焉周氏為鄭鉅族于時曾大

父中奉大父大中皆無恙內外百口婦道為難夫人事
上以孝待敵以禮接下以和無間言者初祖塋之側有
腴田焉其生^主將售之大中欲謀而未有功夫人適大歸
密聞其議啟伯父曰吾奩具可出也近墳之地願可使
他姓得耶伯父以告大中大悅其田遂歸于我靖康間
從伯父守官陝服虜騎夜至盡捐家貲獨取伯父所好
文籍筆硯使婢挾之以逃亂定伯父見而喜曰吾獨念
此君幸全之他不足計也由是益重其賢伯父之為辰
州有大姓以私匿亡命抵獄僚吏讞欲殺之伯父歸而
疑其故夫人曰官有常法疑則從輕可也伯父之意遂

定其人以全嘗晝游郡園道遺首飾厥直數萬求之不
獲伯父御下素嚴一府震懼夫人戒左右使勿敢言俄
得其盜則既分毀之矣乃使子弟慰諭而遣之伯父平
昔宦游勤於官政未嘗問及私事夫人以身任責故伯
父得行其志粵自南渡遭家多難遺孤滿目伯父收集
教育俸入或不能給夫人以約為益憐拊倍至凡出入
吾家者莫能辨其子姓戚疎也辛未春伯父即世于虔
貧無甌石夫人殊不介念而益勵子姪以學使無忘前
人之志家有故笥蓋魯高時物其後繼世擢第轉以相
授今年秋度卒內訌蒼黃出弄身外無復一物及門夫

人獨悵然曰古笏不可棄也並命健者反取之以行其
識度類如此俄以疾終于廬陵紹興壬申十一月癸丑
也享年五十有五嗚呼伯父之喪線斬未除而天不憖
遺仍降大禍為善之報無所憑矣夫人慈惠有容待人
一以誠信化行閭內下不忍欺教督諸女俾熟於詩禮
咸謹婦道姻戚儀之初以伯父陞朝啟封孺人再命為
安人生四男必達必端必正必先四女長適右從政郎
呂坦中次適右迪功郎李延世二早亡適李氏者亦止
矣孫男一人曰繹孫女三人諸子卜以是歲十二月甲
申日舉夫人之柩祔葬於吉州廬陵縣膏澤鄉金鳳山

伯父之瑩永惟夫人之淑德懿行當求巨筆勒銘幽窆
以襄事之逼也故諸兄命某誌之夫詞主乎信則無飾
情極乎哀則無文勉竭肺肝紀實而已銘曰

猗與夫人女子之師來嬪大家婦順母慈始終于仁
宜燕其晚胡戾于天而報之簡凡我族屬洎厥後昆
焚：失恃誰拊誰存涉江而東有崇其岡伯父是卜
龜猶告滅曆吉撰良言歸茲宮銘兮止此哀則無窮

先夫人王氏墓誌 乾道二年

先夫人姓王氏由高祖潛州太守諱亮而上世家博陸
至曾祖左金吾衛將軍諱察始葬安陽祖恩州太守贈

少師諱復考給事中贈少保諱靚又開國焉遂為安陽人妣衛國夫人宋氏先夫人幼善女工通經史博知古今事不自以為能而孝友柔順是專間遇親疾皇：戚戚竭力盡志惟人事之窮聞古有祈天代死刳體和藥者皆屢為之以是父母尤鍾愛年十有七遴擇所歸會先太學博士府君魁釋褐多士有大名遂歸焉未一星終先君即世先夫人奉大母碩人居吉於是伯姊生十年某甫四歲止弟歲未周遭世多艱虜驚盜剽轉徙乏食課婢採掾實蔬苗供養大母次給尊幼必均寧已之餒如是者連月初外氏世顯仕衛國又丞相元憲公孫

丞相龐莊敏公甥先夫人少習長試富貴事也一旦驟履艱窘雖窶人子不能堪處之熙然聞者以為難平居識慮高遠有大庇宗族姻戚之志而不克遂然隨事周急人已懷之紹興丙辰衛國道廬陵大母命先夫人歸寧遂偕行寓信州時某齒少長矣先夫人躬督誦書常至夜分未辨色則以杖警於榻使卧而覆之又教以屬對賦詩已而曰舉業非吾習也為擇汴人陳先生特使從之先生弟子以百數先夫人一衣之華一味之甘輒命某奉焉先生嘆曰有母如此吾忍負之故教某甚切其不能有所成者某質凡也不幸明年衛國病先夫人

省視藥餌廢寢與食躬難能之孝有加于昔暨薨晝夜
號慕至累日水漿不食口人固憂其毀而某冥頑悖戾
不能解釋調護如先夫人所以事父母者萬分一竟以
戊午歲正月十八日不起會疆事未平亟以二月十六
日就葬州北之茶山壽止三十七後某為秘書省正字
遇沛澤贈孺人忝御史再贈安人五男女伯姊適右宣
教郎賜緋魚袋尚大伸婦順母儀其來有自吾兄平叟
不及名吾弟必強有雋才再預鄉薦年三十三而死吾
妹吉孫亦早夭孫一人綸惟周氏再世卜葬廬陵縣膏
澤鄉金鳳山先君諸父以序陪列獨先夫人葬他邦遐

想松檟魂飛心折隆興元年某賴夙訓蒙上恩入侍延
和殿頓首自言願假外祠以畢遷奉詔可之歸與姊謀
會姊病未果乾道二年三月姊又卒孤立自悼益懼溘
先朝露弗遂厥志乃以十月如上饒十一月庚戌啟土
翌日護柩以行十二月壬申達于吉願視先塋兆域相
適不可以祔別卜地於夾河二里間惟長岡之麓食鄉猶
膏澤也庚寅甫窆丁酉窆嗚呼我先夫人孝於親不獲
其報艱厥躬弗償以壽裕乃志弗究其成十年教子而
不及享一日之養天不可問理不可詰將由某為禍為
逆天罰崇降而底是耶承祀任重不敢殞滅願以未死

之年長守丘墓九原之心庶少慰乎以襄事之迫未能
求當世名卿紀述潛懿姑用不孝之辭誌遷改歲月云
孤哀子左承議郎主管台州崇道觀某泣書

亡姊尚氏夫人墓誌 乾道二年

乾道二年三月己巳伯姊以疾不起于尚氏之寢越六
月甲申將葬於吉州廬陵縣膏澤鄉珠禾之原嗚呼昔
我先君先夫人皆以悖實慈孝不獲下壽而亡弟子柔
雋明傑出又中道而夭獨吾姊肖美鍾粹克脩衆德意
必享有耆福為世矩範而天命不延壽止於四十有七
名不列于命婦之籍淑質懿行奄忽以沒嗚呼某尚思

言之周氏世家鄭夫人曾祖中大夫諱衍祖左大中
大夫諱詵父朝請即太學博士諱利見妣安人王氏惟吾
家與安陽尚氏舊為婚姻故夫人年十有六歸今右宣
教郎前知贛州寧都縣賜緋魚袋大伸實政和國子祭
酒佐均之婦天性敏悟知書達物理嫁時雖少已能代
姑主壺政御下有法度接物極和易與人言惟恐傷之
及臨事果斷不惑凜然有烈丈夫之風處大利害畧不
動聲色平居言弗妄發至論事成否語逆順莫不中理
間有請問舊事則雖未亂時耳目所經歷者細大畢記
其道上世流風遺俗本末曲折使人聽之灑然凡與寧

都遊者往：周知其宗族出處分別淑慝至于慶弔交際皆使薄厚中節初莫見其願指之勞寧都仕官不偶生事屢空然個儻喜賓客樂施與家之有無不暇問也夫人節其豐儉彌縫調護人莫能測平居將順規切兩得其宜待人無戚踈一以恩意性尤孝友每及父母早世輒流涕篋有杯捲手澤寶藏數十年無一毫遺墜其哭子柔也哀動隣里自年三十八九得痼疾每發輒劇而經紀家事不廢精神言語泰然不以為憂顧常勉夫以治生進諸子以學庶幾蒙其成佚其老不幸志未就而病棘矣嗚呼其命也夫男五人璆琛珪一早夭一未

名也女三人長適右迪功郎田掾次許武岡守羅公之子尚賢季尚幼孫女一人噫夫人之賢行多矣今不能盡著獨紀其大略如此後世其有考焉其孤苦餘生自紹興癸酉與姊別歷十一年而以罪去朝始得朝夕省侍終三年而遂為之誌嗚呼某尚忍言之

靖州推官張廷傑妻李夫人墓誌銘

紹興三十年

紹興二十九年八月甲寅前靖州軍事推官張君廷傑喪其夫人葬有日使者以狀來請銘某以不文辭推官復書曰士大夫或出或處其行誼才猷皆可表見于世至于婦人女子其處也以組紉婉婉為能已嫁則奉尊

璋勤盥饋耳隱德懿行微姻黨有所不知子毋庸辭某
因念歲丙子過推官于里第置酒相勞苦時夫人迎母
宜人胡氏在席老且病奉養為難夫人左右承顏愉
融：既退則涕數行下若有甚憂者予問推官夫人方
喜而悲何也推官曰是新喪介弟而母未之知喜以悅
親悲則傷其弟也因為予言夫人歸我終閱月父母赴
官江右朝夕憂念遇心疾者歲餘其後父卒哀毀骨立
他日聞誦孝經喪親章輒慟哭愛弟媵尤切有不幸者
追悼至忘食事蓋孝友如此以予所見叅其所聞賢哉
夫人賢哉夫人今既銘其墓不敢隱亦不敢誣按夫人

姓李氏世家平江處士應之曾孫贈右通議大夫雅之
孫而左朝請大夫通判廣德軍寬之孟女也天資簡靜
少長如一通判君以才學起家仕於四方為夫人擇佳
對以推官鄉里盛族方游場屋故歸焉時甫踰笄雖不
逮事舅姑而承尊撫卑適其戚疎人無間言女叔在室
者三夫人禮遇勉飭相繼為名人婦當是時平江張氏
義聲聞淞河以西繫夫人之助推官宦游不遂築室治
園圃日從賓客遊而中外冠婚饋問慶弔無虛月夫人
悉力相之不以累其夫也蓋約于奉已而泰于調急誠
以御下而勤以訓子故宗族之窮困者多蒙其惠而長

子未冠已哀然薦於鄉先鳴于上庠里閭榮之晚事母
愈孝謹調旨甘窮澣濯間于溫清則讀釋氏書平時語
默有常度閨門肅如也居無何胡宜人卒夫人號慕致
疾稍瘳而復作病棘不他及內勉夫以教子外則以葬
母囑其弟而已享年五十生三男聖任聖清聖和三女
左從政郎新揚州錄事叅軍蔡瑤左迪功郎新湖州安
吉縣主簿李安上左從事郎孟并其壻也仲女先夫人
二十八日而天季未行孫男三人鎬鎮鏃葬用三十年
二月壬申其地在吳縣長洲鄉華山天池塢與通判君
墓相望也九原有知夫人其莫憾銘曰

士之百行惟孝為始女子有行鮮克舉此溫：夫人
允有全美而其愛親性實天畀生也色養沒也哀毀
嗚呼夫人可謂孝矣我銘幽宮惟是之紀庶幾無窮
以勸為子

曾監酒母孺人劉氏墓誌銘

淳熙二年

分宜宰謝君諤狀右文林郎曾君光庭之夫人劉氏遺
事累千五百言以授夫人之子敏學敏學復屬其以銘
予謂分宜文瞻事核益之贅矣敏學曰詳在行實要在
銘章古也固請不已會敏學死予悲其意乃序而銘之
劉氏本長沙人後徙臨江軍之新淦縣夫人曾祖德誠

祖如新父義。有隱德嘗辭遺逸之薦者賢其息女以歸文林惟夫人幼服姆訓長嫻婦道事舅姑孝待宗族敬內外交譽間言弗聞文林官湘中當靖康之難率零陵民兵勤王夫人力脩閭政日以詩書課其子姑嚴夫人留鄉里寇攘梗道數走介間閨問安使文林悉力公家不貽親憂比七年歸奉盥饋于堂上男孺女柔濟列侍嚴夫人喜曰賢哉婦興吾魯氏矣文林既倦游築大第桂峯之下別開槐堂招致游士又以餘力治園圃燕親賓間遇歲歉賑廩平價大庇一方夫人實相之文林沒益勵諸子以學問某賢也可師某能也可友必厚

禮重幣延置家塾嘗曰蓄田千畝不如藏書一束故不吝金帛以求之挿架幾萬軸子孫聞見駁廣藝業日有聞對策集英者三貢於鄉者十二文風藹如也紹興己卯滋寧太后慶壽八十有詔子為貢士得封其父母之高年者於是有孺人之命後遇郊恩加賜冠帔年九十三以乾道七年七月二十四日卒是歲十二月丙午葬吉州吉水縣仁壽鄉萬安里西岡之原夫人五子長右脩職郎饒州德興尉敏遜次鄉貢進士敏脩次敏德次迪功郎監隆興府豐城縣戶部贍軍酒庫即求銘者次敏行一女適鄉貢進士毛穎士孫男十五人三益三錫

三復三省三畏三聘三觀三壽三登三接三顧三異三
協三英三達預貢者三益三省三畏而三復三聘相繼
擢第今為德安隆興二府教授惟三益早死餘皆力學
女八人曾孫男九人宏圖宏度宏議宏規宏基宏模宏
寄宏舉宏量女亦九人夫人天性勤儉既以自勉亦以
誨人御下慈和念勞而忘過家侵隆盛不矜不驕年登
耄期未嘗謁醫孫曾滿前日娛其老世所願欲一無憾
為嗟乎壽富康寧好德考終能備者鮮矣而况脂田命
服寵光鼎來孝子順孫祿養踵至古稱五福今乃七之
是宜勒銘以信來裔銘曰

維德戒：維報芄：綿延厥家寧止我躬鬱其西岡
宜松與栢奕世不凋視此柯葉

王給事母安人徐氏墓誌銘 淳熙三年

淳熙丙申立春氣應皇帝慶太土皇壽于德壽宮大赦
天下文武陞朝官並許加封父母中外蒙恩者不可計
獨計臺省寺監職事官不啻乎百人其及親者總二十
有三而軍器少監兼考功郎官王君之母太安人徐氏
在焉命書既下合監之僚屬暨六曹同舍郎皆踵門賀
退而咨嗟嘆息咸謂婦人能教子以儒術起家者固少
而有子入為王官者加少若乃國家非常之慶絲綸再

命之寵是又千載而一遇者非積善在躬享有多福曷
至是哉嗚呼可謂難也已矣居久之太安人疾作少監
請於朝願假使者節若太守章出便醫藥天子與大臣
嘉少監在考功能以精明澄四選強毅任衆怨方顯用
之不聽也已而太安人竟卒于是前日之客復弔少監
于廬予亦至焉少監杖而泣曰吾母之賢朝士舉知之
子父以文知我顧不知吾母乎願以銘為托他日遂以
其鄉人將作少監兼吏部郎官吳君飛英之狀來則序
而銘之徐氏世家處州之青田太安人曾祖新祖崇父
順年二十二嫁同郡王公長方逮事舅姑以孝謹聞王

公故貧與二弟大方義方俱嗜學自太安人來歸家事
日理不以衣食累其心而專於書故大方登博學宏詞
科義方亦有聲上庠起家永福尉獨公困躓不偶與太
安人日夜教子及見其登進士第中學官選而沒後贈
右承事郎太安人慈祥勤儉綽有容德待娣姒以誠御
婢妾以恩少監每與客語輒耳屬於屏既歸枚數曰某
賢可與游其不然勿親也後多如言蓋從其子官于朝
者五年劬躬擇隣迄獲豐報初以乾道九年冬祀恩封
太孺人至是益進封云其卒實三年四月十六日享年
六十有九是歲十二月甲申葬于麗水縣靈隱山承事

公之側生三男信即少監也价嘗與國學薦偁早世一女適進士何京孫三人一男二女銘曰

光輝為陽晦藏者陰婉：女士難乎邦聞猗與夫人克艱於始祿不從夫幸哉有子：也多才夫人成之國有大慶夫人膺之遂都榮名人以譽歎歸安斯立永矣奚憾

程給事母宜人胡氏墓誌銘

淳熙 年

宜人胡氏故朝散大夫致仕程公晉之：室今給事中叔達母也徽州黟縣人其先有名育者仕晉為新安太守因以占籍其後名星為蕭梁太常卿既沒而廟食族

系日以蕃宜人曾祖德勤祖義璇俱隱跡弗耀父獻卿好賢樂善一鄉稱長者生五女尤憐愛宜人謂必為名婦聞大夫早有賢譽故以歸焉程氏衣冠蟬聯與胡氏世通婚姻大夫祖母太碩人世母咸寧郡夫人母太孺人皆宜人近屬也始嫁翁姑高嚴娣姒如雲宜人恪共盟饋勤劬賓祭承上接下動有法度中經亂離褚篋一空約身縮用助大夫經理家事秋毫無妄費至資其子宦學四方則略無所靳給事以是少年登進士第解褐歸拜重親里閭咨美翱翔仕路風節議論日益有聞入佐天府大夫宜人年皆七十餘休沐必娛侍西湖上閭

登天竺諸山諸孫先後扶攜二老人輒却之曰吾方健
汝毋憂居亡何長子叔向季子叔豹相繼死宜人始忽
忽不樂頗苦微恙給事遂亟求守通州以便養未行擢登
御史府進左司諫數請外上固留之宜人亦曰吾念二
子耳汝之去留吾何擇為悉心報主所以慰我心也給
事乃不敢言明年宜人竟不起實乾道元年八月二十
九日壽七十有五後十四年而大夫卒宜人生三子給
事其仲也二女嫁任允迪黃珏孫男九人鑄鎔鎬早世
鉉從政郎荆湖北路安撫司幹辦公事錫從事郎婺州
蘭溪縣主簿銛鉞鎮未仕孫女十一人曾孫男五人鎮

孫子八未名寧孫子六重一早夭宜人初葬縣之長遙
山大夫以其地下濕別卜地于北山亭古城培之原淳
熙六年八月二十九日甲寅葬焉給事之為少尹也某
備官于朝一見如故知每聞宜人慈惠肅敬四德兼茂
知古今通釋氏書常敬仰其賢又聞翁媪偕老子孫方
昌怡：愉：百順具備未嘗不自恨不天不復有此樂
也踰一星終復與給事直禁林侍經幃僚承華情義款
密舉朝莫擬給事每云吾父滋老欲改葬吾母而未敢
他日尚屬子銘予敬諾已而給事以直龍圖閣奉祠歸
而大夫沒書求踐言其何可食銘曰

婉孌肅莊以承尊璋儉勤淨方以從其良擇隣儲社
又燾厥子展如夫人不曰賢矣匪劬其躬孰報之豐
謂或不信盍觀初終相彼新阡有原膺：利其嗣人
以奠終古

孟媪葬記

佛書云汝未舉心塵勞先起學道者晝夜刮磨其去未
銖兩而其積已鈞斤矣所貴乎無心者以其無此患也
某之先夫人乳媪孟氏未嘗學道而能以無心處世故
憂樂不能移物我不能二而其死也超然自在卓然竒
特有精練老僧不可及者此豈區：刮磨之力哉根器

異耳媪東平人父孟某母李氏以元豐元年正月三日
生少嘗適人而其夫凡劣不可依李氏謝絕之攜媪來
吾外家乳先夫人方外家隆盛時金帛填委同輩皆厚
自殖媪視之蔑如也顧獨喜博負雖多懽然無吝容勝
亦散之未嘗有所貯積戊申己酉歲江浙大亂吾家轉
側兵火中而先君不幸後十年先夫人復謝世益多故
矣人為媪戚：媪自若也遇博輒抽簪質衣一笑為樂
性淳直闔裕待人如我視我如人與童子言不異長者
人有不直亦媪罵弗恤其人愧服曰媪言是吾不怨至
于事媪以上與夫逢迎賓客則又執禮無違雍容可觀

見者知故家遺俗自有體也伯父辰州府君御下嚴甚不假左右以色獨于媪加禮焉始媪年三十五已受戒屏葷酒時取佛書誦之亦不深泥名相笑歌嬉遊陶然自樂如是者數十年當紹興壬申秋卧疾于贛會齊述反某與亡弟子柔夜挾媪出城得舟下廬陵寓永和鎮之本覺院其病浸劇蓋踰時側身而逝十一月十三日也年七十有五時亂未定某亦大病幾死子柔遂以茶毗法化媪薪盡頂骨如雪而舌不壞舍利綴屬無數緇素駭嘆惟媪性與道合豈以此為異然使不緣倉卒擾攘之故具棺槨以葬則亦何自見此奇特哉後幾日

瘞其骨于水東金鳳山其處又後十一年某歸自臨安始為立此石時子柔之沒已四年矣悲夫隆興元年七月具位周某謹記

芸香墓誌

周子充之侍妾曰芸香姓孫氏錢唐人父德以其淳靜謹畏精于女紅頗能為新聲事予于行在所時年十七後二年從予歸廬陵明年六月一日病死為買地州南二十里聖居山葬用七月十八日實乾道九年

省齋文稿卷第三十六 終

省齋文稿卷第三十七

周益文忠集三十七

青詞

疏文

祝文

祭文

勸農文

皇后生辰三茅觀設醮青詞

淳熙十五年二月二十六日

氣淑春陽茲惟令序祥開月夢載紀誕期仰陰教之素
脩罄群心而申祝肅裒羽士祇按瓊科伏願誠格穹蒼
慶流宮掖天作之合丕延有永之年邦享于休共對無
疆之祚

潭州祈雨設醮青詞

紹熙三年閏月七日

政績繆戾至干陰陽之和物當發生乃愆雷雨之澤雖
嘗奔走於群祀未敢瀆煩於上穹今春色已深農務正

急而波池久涸田畝失耕若非致力於初何以責成於
後孰能為地惟可呼天伏望閔民無辜赦臣有罪擴乾
坤之鴻施釋黎庶之憂心三日為霖示有秋之嘉應多
龍則早破自昔之俚談

設醮青詞

乾道五年十二月十三日

閨門垂宣滯之宜莫施祝劑肺腑籲

敬遵科式仰謝生成冀真馭之下臨俾寸誠之上徹
永垂道蔭均庇寒門

夫人設醮青詞

淳熙九年正月七日

乾坤大德無物不生蝼蟻微誠有求斯應俯循弱質每
困宿疴懼多積於悔尤思少伸於祈謝敬逢人日祇按
冲科延望碧霄虔輸丹悃願言四序之內永保安寧仍
俾一門之中同臻康泰誓圖報塞彌謹薰脩

又 淳熙九年

三年疾恙曾藥石之弗離一意禱祈庶災屯之可弭屬
將更於歲律且密近於生朝祇按冲科肅延淨侶少効
蘋蘩之薦用伸蝼蟻之忱伏願上帝垂慈列真降鑒宥
向來之罪戾錫此去之康寧惡曜或加賴天恩而轉喜
福基雖薄資聖力以增培永與家庭同承道蔭

設醮青詞

淳熙十年閏十一月望日

德輜智淺已慚位序之高命薄福輕復念年齡之晚屬
 歲華之將易推星數之多虞火字臨高強之宮日時晦
 甲己之位適因 懇馴致痊平靜言不肖之愚氓何事
 靡干於聰聰因其生育之日罄乃熏脩之誠既謝前愆
 亦微後福仰祈福燾永保康寧

又 乾道九年六月七日

善惡繫於人為固當脩省災祥由乎天數亦許祈禳貌
 是微生困於宿恙矧運氣之適併懼尤悔之相乘敬即
 家庭仰干道蔭伏願真游降格鴻造恢施錫康寧於視
 履之間均信順於閨門之內

又 淳熙四年五月七日

養生無術既乖寒燠之宜制命有常適值災屯之會蓋
 嘗推運限而懼星辰之下照亦復省才能而知祿位之
 踰涯既未遠於退休合少伸於醮謝伏願寸誠昭格洪
 造鑒觀貸已往之愆尤錫方來之康泰更均道蔭垂庇
 寒門

佑聖觀夫人設醮青詞

淳熙六年十一月十一日

天雖難謀誠則易格伏念妾昨嬰疾恙深慮災屯故當
 呻吟默致懇禱旋臻藥喜頓釋隱憂荷高穹之至仁從
 匹婦之微願今 仍適新春用虔致於薰修庶預

唐文公集
卷之七
三
伸於禳謝伏願列真降鑒丹悃潛通消來日之災屯錫
哀宗之庇蔭壽命延於兄弟康寧逮乎室家稽首投誠
傾心俟命

夫人設醮青詞

淳熙十一年四月

福善禍淫豈私於匹婦跼高躋厚當罄於一誠蠢爾微
生居然多病矧愆尤之常積宜災屯之是虞匪假薰脩
孰伸禳謝伏願乾坤覆載僊聖鑒臨星躔易咎以為祥
運氣轉凶而逢吉俾闔門之康泰誓永世以依歸

設醮青詞

淳熙十二年正月丙午

官崇而祿益厚未知稱塞之方福過則災或生凜有憂

虞之象因歲華之載易適運氣之將交念多積於過愆
恐浸招於凶咎肅哀羽士祇按仙科庶假熏脩少伸禳
謝伏願衷誠上達神鑒俯昭擴善貸之深仁憫孤懷之
多懼賜以公私之無惱俾其老幼之咸安誓堅惕厲之
心力報生成之造

夫人設醮青詞

淳熙十三年十月七日

惟疾之憂嘗攄丹悃勿藥有喜旋荷洪恩自非憑蓋高
蓋厚之仁何以篤惟子惟婦之慶既資幹蠱之裕且幸
弄孫之歡敬卜佳辰少償夙願伏望宵晨降嘏時序蠲
災錫老幼之康寧誓初終之歸嚮

遷右相府設醮青詞

淳熙十四年四月十五日

福善禍淫何私於覆幬避凶趨吉敢緩於祈禳言念微
生猥膺重任雖有効忠之志而無經遠之才甫即攸居
深虞曠職敬陳章醮祇叩天聰伏願誠悃上通祺祥下
集惟長少獲安於私室則勤勞可効於公家蠢之愚
拳之於是

設醮青詞

淳熙十五年八月十五日

謹疾無方值陰陽之大寇踞高有謹請本家室之至情旋
臻藥石之功仰賴乾坤之施載消吉旦祇詠靈篇脩清
淨之勝緣償禱祀之素願仰祈洪造俯鑒微誠字在強

宮雖還而不害歲移飛限縱遇弱以無憂推是蔭庥
均於老稚

遷左相府設醮青詞

淳熙十六年三月十九日

小才何取偏儀輔弼之聯廣廈既遷彌積高明之懼甫
更月律思及誠心因元命之紀辰叩上真而籲懇伏願
博施造化兼利公私章厥俊民家有平康之望介茲景
福神惟正直之臨草芥雖微乾坤所鑒

遷入廬陵舊居前一日設醮青詞

淳熙十六年十一月丙午

從宦無功言歸有幸惟茲環堵僻在東城人或議其陸
沉臣竊安於幽屏將於詰旦爰即攸居值初度之日辰

按冲科之儀式念福福之求由已愈當淑謹以視身惟
災祥之降自天必賴神明之垂佑倘四序常臻於康泰
則一門永荷於生成

薦尚氏姊水陸文 乾道二年

姊弟同氣期畢世以相依死生異途悵終天之永隔欲
寫無窮之戚必資最勝之緣按梁武之舊儀演阿難之
遺教設衆香之鉢以屬饜萬口燃無盡之燈以遍照九
州庶幾凡聖之普霑可使自他之俱利伏願佛慈無礙
願力無邊消止者塵：劫：之罪愆釋止者世：生：
之冤業受天人之至樂慰手足之深悲

焚黃水陸疏文 乾道六年

薄命天窮莫奉過庭之訓湛恩日富屢頒告第之書適
生育之載臨念劬勞之缺報集寶坊之淨侶演焦面之
遺文熏脩罔間於冥陽悃幅尚通於幽顯伏願承佛威
力受國寵榮永從極樂之遊少慰遺孤之望

廣教寺設供疏文

孝極事親每自憐其孤苦禮嚴上塚乃父困於飄流由
多生罪逆之至深故今世報緣之如此逮被漏泉之澤
益懷反哺之悲恭即寶坊虔修淨供追崇梵福雖人子
之至情升濟冥途亦導師之本願仰惟慈愍俯為證知

判潭州謁宣聖文 紹熙二年

欽承上恩付以民社居敬而行簡懋德以帥下古有明訓其敢不勉先聖先師實鑒臨之

謁諸廟文

忠信慈惠然後民安之靖共正直然後神聽之此某夙夜所當懋勉若夫順豐年迎時雨寧風旱弭災兵遠辜疾凡是數者非有相之道則因攸濟視事伊始敢不告虔

南嶽行宮祈晴文 紹熙三年十月一日

維皇降康眷是湖湘畝有餘糧農夫洋洋黍稷稻粱指

日積倉孰云肅霜而以雨妨顧瞻圃場惆悵傍徨吏治弗減惟知祈禳帝功夙彰曰暘則暘毋令豐穰反虞災傷齋心撰良祇薦令芳言錫之祥報敢怠遑

東明寺祈晴文

下民望歲欲多稼之豐登大士應緣隨衆生之祈禱瞻言農畝幸底金穰乃當刈獲之時未息霖霖之雨人將咨怨吏則憂惶茲仰叩於覺慈庶速回於霽景伏願運神通力開方便門消散積陰現祥雲之紛郁破除諸暗舒慧日之光明毋棄壞於全功永歸依於妙智

南嶽正廟再祈晴文 紹熙三年十月十二日

帝惠南土賜之金穰孰云既成寔以陰雨干和致沴由
政弗減三農何辜失此一稔禱祈雖應旋即沛然吏民
皇：縛手無策欽惟嶽鎮大庇方維日暘而暘易若反
掌豐凶之決莫急於斯開霽旬時庶其有濟投誠請命
必冀於從

東明再祈晴文

比以連陰害於多稼脩殫懇悃僅獲感通日方出而雲
遽凝土纔乾而雨復作致災之故端本吏愆壞物之成
決非天意敢辭屢瀆仰叩至仁惟賜之半月之晴則濟
此一年之事精誠已竭聰聽必孚

南嶽謝雪文

紹熙三年十二月

臣守茲土無術消沴春而謂雨秋而祈霽自冬徂臘雪
未平地仰瀆於神亦云急矣帝奠南服有求輒遂曰雨
以種曰暘以刈盈尺之祥又驅疾癘加惠斯民亦云至
矣再拜於庭且謝且愧其卒相之以興嗣歲

南嶽行宮祈雨文

紹熙四年

冬春之交無大雨雪候踰驚蟄農務方興田畝未濡陂
池尚涸先事而慮豈惟有司稽首靈祠齋心致禱願恢
旣施霈之甘霖以兆豐年其敢忘報

南嶽正廟祈雨文

臣守藩無狀冷氣干和乃自歲端雨不時若驚蟄而後
暖氣蚤來三春過半種未入土耕夫束手穡事可虞仰
止帝庭歸誠請命臣實有罪罰其敢逃民之無辜祈賜
矜憫願下膏澤庇茲一方呼吸之間需以甘雨敢忘報
稱庸謝鴻恩

南嶽祈晴文

乃者芒種之前日臨甲子大雨傾注人胥憂疑自是以
來霏霏連夕下田甫種巨浸壞之其在目前固已甚懼
為霖既過後日或愜靜言思之益以惴恐吏慚無術帝
力可回曰暘而暘所望甚切願留甘澤以濟後圖虔叩

行祠必祈響應敢忘飭勵仰稱慈憐

又

三時務農其成在冬帝眷南邦賜之屢豐是刈是春偶
未訖功窘此陰雨憂心忡忡乃迎甲子請命於宮既惠
其初忍墜厥終霜風掃曠晴日麗空有祈必報其敢不
恭

南嶽行宮謝晴文

梅霖應候謁霽非時水溢下田為民僭瀆聖功響答祈
謝敢稽繼自於今五風十雨庶成稔歲併用禱祈

府治謝晴文

紹熙四年十一月十日

歲有饑穰帝司其權辛酉之夕風雨甚顛多稼雲黃炭
炭於田顧瞻行宮逝將乞憐踐濕以往迎曦而還呼吸
之間成此豐年若民與吏拜賜欣然吉蠲為饕維以告
虔

改判隆興府辭宣聖文

紹熙四年十二月

某乃者親事之始祇見學宮居敬行簡懋德帥下有是
言矣三年之間雖愧允蹈亦弗敢諉也今蒙恩易鎮鄉
部於其將行不敢不告

辭諸廟文

紹熙四年十二月

某分鎮湘楚三閩嘉平毫髮之惠罔及于民立山之賜

獨賴於神四鄙不聳百穀用成恩徒鄉部以為歸榮莫
知報德維以告行

祭勾芒神文

紹熙三年

青陽開動太皞御辰天地和同根莖發生爰出土牛以
告農耕祇薦醪羞徼福明神克相東作以底西成

潭州勸農文

紹熙三年

紹熙三祀仲春既望遵奉詔令勸農於郊重湖以南地
廣人眾田畝高下有肥有磽欲致屢豐在勤四體東作
鹵莽西成亦然告爾農民深耕易耨用天之道隨其蚤
晚分地之利成其膏腴脩爾陂塘早乾有脩畫以溝洫

水溢何憂母事情遊以妨本業毋興鬪訟以致污萊父
勸其子兄勸其弟共期富庶咸聽母忽

省齋文稿卷第三十七 終

省齋文藁卷第三十八

周益文忠公集三十八

祭文

同兩倅帥屬祭吳漕之母徐淑人文

嗟惟淑人嬪於大家早慶三遷之効晚綏五福之遐儼
孫曾分在列絜絲綸兮屢加惟為善之獲報信天道之
無差憶四月之維夏瞻版輿而歎嘉曾晦朔之幾何易
繡衣以哀麻雖榮養之無憾終人生之有涯旅官僚而
薦酒聊以慰夫皇華

祭宋待制文

紹興三十二年二月

惟公以絕人之才膺象賢之報年甫四十固已遊供奉

水溢何憂母事情遊以妨本業毋興鬪訟以致污萊父
勸其子兄勸其弟共期富庶咸聽毋忽

省齋文稿卷第三十七

終

省齋文藁卷第三十八

周益文忠公集三十八

祭文

同兩倅帥屬祭吳漕之母徐淑人文

嗟惟淑人嬪於大家早慶三遷之効晚綏五福之遐儼
孫曾兮在列粲絲綸兮屢加惟為善之獲報信天道之
無差憶四月之維夏瞻版輿而歎嘉曾晦朔之幾何易
繡衣以哀麻雖榮養之無憾終人生之有涯旅官僚而
薦酒聊以慰夫皇華

祭宋待制文

紹興三十二年二月

惟公以絕人之才膺象賢之報年甫四十固已遊供奉

之班總六路之漕矣於斯時也雄鋌利刃人皆知之而孤忠膽智猶闇然其未暴也迨靖康之初元駭群小之媚竈掩慈孝於兩宮紛是非而顛倒微公篤志於君親竭誠於傳導則輔國之謀遂成而梁冀之賞可冒矣嗟時事之天知謂豈弟之神勞奚多言之不宥曾未弭乎憎好明：元后日臨天燾因永念夫先烈爰追揚於特操復邇聯於邃清加異數於期耄想精神之折衝守謀猷之入告胡厭薄於斯世乃歸全而高蹈藐一介之彌甥憶宗壙之屢造從容乎潁水之上款密乎鍾陵之奧示元憲之遺書期妄庸以遠到恍十年其一夢倏終天則參稽乎手誥可也

祭許寶文文

紹興三十二年五月

惟公天與俊傑心潛藝文才具之敏工師運斤學殖之豐農夫力耘來游帝郊簪笏玄纁中臺有蘭西崑有芸是握是拂英聲日聞皇曰試之牧民馭軍於虔於桂除荒靖氛內閣進直旌能第勲屬時艱難毀譽糾紛或廢或興有猶有薰公心淡然不為戚欣晚以几杖歸安鄉粉年則耄矣色猶閎：辨有鋒出慮無絲禁百年雖長既晨必曛死生在公夫何足云惟昔王父得公樂群成

均之鼓共警朝昏元符擢第並揚清芬交情孔密壽殀
中分惇：不肖寓顛之濱公以耆舊來為邦君輩行雖
絕誨憐則勤時置賓筵笑歌紛紜一別十年萬事浮雲
歿不拊棺葬不即墳言念疇昔憂心載焚漬酒以絮實
登以芹寓詞叙哀雪涕零：

祭子柔弟文

維紹興三十二年歲次壬午七月丙申朔二十四日已
未兄具位周某謹以清酌之奠告於亡弟子柔十解元
之柩昔吾弟之病革命火化而投諸清冷之淵我知之
矣慮以遺骨累兄也故忍死而為是言噫嘻痛哉寓棺

佛寺今二年矣會仲兄調官西歸始得返君鳳山之原
雖川浮陸走未免乎撼頓而一勞永逸蓋將從先大夫
於九泉惟兄不友戀嫪寸祿拘牽文禁既不得共載而
西又不容引紼而前寫苦言於一奠抱沉恨以終天冀
英靈之未泯涉遠道以安然

餘杭祭十一妹文

紹興三十二年

吾妹姿相豐碩沉厚寡言以世法論之意其壽且福也
奈何年未三十而遽夭乎哉豆殽旅陳歌此奠章寄其酸
辛嗚呼哀哉尚饗

祭羅長卿文

隆興二年十二月

維隆興二年歲次甲申十二月某甲子具位周某等謹
以清酌庶羞之奠致祭於故會昌尉長卿五丈之靈嗚
呼撲屬之車噐攻材良一日出門折軸傾箱如下澤
弗已於行有幽者蘭久含國香未韡其華乃萎於霜不
如蔓草自全其生相彼二物類吾長卿嗟乎長卿博洽
精明志行萬里名高一鄉如車斯堅如蘭斯芳試之邑
尉豈曰騫翔乃蹶乃枯誰毀誰戕昔我卜居十里相望
每到君家必羅酒漿歡呼竟夕交舉罰觥君又善戲謹
而不傷分雖朋友心則弟兄謂當華顛畢此交情豈知
今日遽哭其喪嗟乎長卿：真亡矣古書多誤誰發明
矣近事或疑誰考評矣觀瀾風月失平章矣山房圖籍
虛暴涼矣升堂一慟涕泗滂矣嗟乎長卿情未忘否鑒
此誠否醕此觴否

祭林虞仲教授文

乾道元年六月十三日

維乾道元年歲次乙酉六月戊寅朔十三日庚寅具位
劉令猷具位周某謹重以清酌茶果之奠告於虞仲教
授同年林兄之柩嗚呼君學雖苦詞藻則敷君貌雖瘠
志氣則腴一第起家遊亨衢百艱隨之寸步崎嶇再
終親喪小試師儒談經一年乃與病俱臨食不盡逢觴
不斟卧榻頻仍人為君虞君獨謝醫我疾且蘇卒莫能

興豈命也夫人生夢幻百年須臾何壽何夭何榮何枯
君則往矣傷哉其孥男齒未齧女髻未髻弔者酸辛忍
聞呱：情義所敦况於吾徒邈焉七閩南負海隅何以
再拜瞻墓之榆何以千里撫君遺孤薄酌我酒薄奠我
芻哭送江濱目斷檣烏終天之訣已矣嗚呼伏惟尚饗

祭張德莊監丞文

乾道二年三月二十三日

維乾道二年歲次丙戌三月甲辰朔二十三日丙寅具
位周某謹遣私僕以清酌庶羞之奠敬祭於故軍器監
丞同年德莊張兄之靈猗與德莊敏達溫恪奮身儒林
學種文獲有^板拔之朝入佐帥幕翔於泮水使於大漠歸

教朱却人歎淹泊戎監稍遷鴻漸臺閣遂止於斯理實
難度惟我鄭邦東汴西洛冠蓋之盛如越無罇以是鄉
敬容或濶畧今如星辰反愧土著惟我與君是用歎愕
思矯其弊忘此懦弱同年之好同朝之樂朝夕游從日
月博約自我不見歲再更籥訃來失聲膺為之搏我楚
君吳星分壤各矧復抱病淹留訪藥曾不弔孤曾不扶
擲曾不遣使片詞是托生也相厚死其何薄誠非效尤
亦祇愧作尚余鑒衷未吐斯酌臨風孔悲涕淚俱落

祭黃世永編脩文

維乾道二年歲次丙戌四月甲戌朔十七日庚寅具位

周某謹遣人以清酌庶羞之奠致祭於亡友世永編修
學士之靈嗚呼世永始予之蹶於讒蹇於位也吾謂子
畸於人而已耳非天意也及夫歸弗逮於故鄉年弗登
於強仕抱修能與矯節迄不使之一試是造物之子困
非人力能軒輊矣雖然吾猶疑焉富之以問學昌之以
詞藝發之以剛明行之以精銳紛百出以皆長羗何美
之不偕曰天不相豈如是也亦既相之曷又棄之非惟
棄之而又斃之天耶人耶誰怨誰懟寓詞千里為子慟
哭流涕而已矣伏惟尚饗

祭宗人子婦李氏文

維乾道四年歲次戊子十二月戊子朔九日丙申具位
周某謹以清酌素饌之奠致祭於宗人武翼子婦李氏
昔夫人遐道而沒我先祖實貳茲邦惟宗婦之故為旅
殯於僧舍今踰四十年而夫人之家莫有至者茲用卜
其宅兆依我先壠豈惟使夫人體魄有歸亦所以成先
祖惇叙宗姓之遺意夫人其安之尚饗

祭察推劉辰告母歐陽氏文

乾道六年正月三十日

嫁而從夫仕顯家肥老而從子祿養不違謂當百年錫
服副禕身亡子天同以喪歸昔者榮樂人今歔歔矧託
至契熟聞清徽酌觴再拜言隨涕揮

祭劉辰告令散文 乾道六年

嗚呼往貢於鄉四人獲升惟我與子科齊齒朋子賢我
愚我否子能敢辱交游契好是憑二十年間義均股肱
我隱青原子官武陵三歲不見尺書數騰我方倦飛退
避繳矧期子奮發萬里鯤鵬云何中道而失騫騰惟子
之孝鄉閭所稱病而哭母喪豈能勝遂以毀卒噫誰子
憎銘旌來歸我悲填膺望子之堂胡寧忍登尚眷疇昔
舉我有蒸

祭外舅王察院文

維乾道六年歲次庚寅閏五月庚辰朔二十六日乙巳

壻具位周某謹以清酌庶羞之奠敢昭告於外舅提刑
察院王公之塋嗚呼公有通經博古之學而不盡施於
事業有撥繁濟劇之才而不盡見於施為官雖遷而人
猶悼其屈年雖高而志未向乎衰此中外所共悉非親
黨得而私也惟鄙不肖為公所知二十年間有合有離
往聞公抱病於南溪之上蓋嘗冒彭蠡之險涉長江之
危曾是四旬之緩悽然隔世之悲雖徘徊之累月迄差
池於葬期念佳城之一閉倏芳歲之三馳粵自江而徂
浙忘雨沐而風吹逮弭擢於故居懷握手於平時何英
姿之凜々乃封土之纍々跪陳詞而薦酒莽無言而寄

思嗚呼哀哉尚饗

祭汪養原待制文

維乾道七年歲次辛卯正月丙子朔十六日辛卯具位
周某謹遣人以清酌庶羞之奠敬祭於故敷文閣待制
汪公之塋嗚呼人孰無才考德或非位孰不顯得君者
稀嗟惟我公克實光輝往在宮庭言無脂韋厥初漸遷
久始登畿上一見之決付政機升之諫省試之禁扉正
論攸興繫公是依民之無祿公則病歸遺書繼聞皇心
歎歎惟愚不肖世所訶譏公獨何取乃與衆違章江十
日論析精微我舟既發公蓋猶飛倘知永訣別泪忍揮

念言及茲痛聲屢噫人生幾何朝露易晞惟有賢子不
朽庶幾天報可必豈待禱祈遙陳奠觴已矣音徽嗚呼
哀哉尚饗

祭趙溫叔雄舍人母楊令人文 乾道八年三月

嗟：夫人行為女師三遷之教允義且慈帝謂子賢母
其可知錫之令名象服是宜母來蜀道子返朔陸粲然
金章迎拜達都：人聚觀羨慕嗟咨子且廊廟母當期
願有斑萊衣忽焉齊哀有華蘭陔宛其素幄榮悴難謀
旁觀涕洟矧鄙不肖託契於茲升堂而拜謂且不遲孰
云夫人而遽止斯走弔令子心焉孔悲

祭胡季懷文

乾道八年七月

惟君學窺古人氣蓋一世屏遠紛華耽悅文藝南宮屢
上壯志彌銳謂都卿相何有科第中道而歿命也胡戾
萬生擾：誰則不逝之子之才期在經濟而止於斯為
善何勵念昔識君實偕秋計相從二紀浹洽儔儷時中
之堂日或重詣尋繹典籍考評興替休以棋酒雜以卜
筮隔晨不覿已駭奴隸如何分手曾未閱歲訃來千里
拭面反袂今我言歸君既祥祭顧瞻舊游悼念交契心
焉孰論駕焉孰稅孰陪笑謔孰解愚蔽惻然百懷寄此
一醞幽、總帷髣髴來嚙失聲大慟老淚盈皆

祭芮國器祭酒文

維乾道八年歲次壬辰十二月乙未朔九日癸卯具位
周某謹遣人以清酌庶羞之奠致祭於故右文殿脩撰
芮公之靈惟公之德渾厚正直惟公之才恢闔俊軼克
孝且友其秉也天勇於蹈義則由學然發於為詞章登
唐近漢著於議論弗詘弗諂士有險夷道無磷緇從容
周行譽問孔歸君子所恃而亦不比小人所畏而亦不
忌帝庸深知決用靡疑云誰不仁遽殲奪之太學千英
毀譽雜出聞公之喪隕涕如一况我鄙介交分尤深初
為主管同事司成遷正麟閣我猥公先傳刀之夢暮年

輒驗執筆太史分察南臺凡我所歷公必繼來我之投
閒僻在螺水公使嶺表過我蕭寺公徒金節我起持麾
不會於閩而過於畿公長國子我塵少令官曹俱清班
綴愈近湖山擇勝尊酒論文如何俯仰其迹俱陳殄瘁
之悲曰惟衆共死生契濶其如予慟蒼黃去國莫奠生
芻有慨於中身楚心吳夢為斯文以酌靈几寤而驚叱
終記三四昔烏氣合今固神交公惟不忘忍吐斯殺

祭靖州太守李發文

維淳熙元年十二月日具位周某謹以清酌家蔬之奠
致祭於知府李公之靈噫公之學博貫今昔噫公之才

善理繁劇雖更五郡用則未極雖越中壽年胡不百有
丹其兆爰即窀穸酌於道周寄此心惻嗚呼哀哉

祭洪景巖樞密文

維淳熙二年歲次乙未二月癸丑朔十八日壬申朝請
即克右文殿脩撰提舉江州太平興國宮周某謹遣人
以清酌庶羞之奠敬祭於故天資政樞密鄱陽公之靈
嗚呼天生雋才於德或靳公優班馬而望顏閔士有其
資罕或逢時公際勳華而為臯夔曠幾百年鍾是全美
宜享黃髮卒相天子何成之艱而往也過膏澤在人疇
不潛然矧伊不肖嘗綴賓客試於玉堂公實發策哲人

云止倍蓰其悲物雖薄矣誠則庶幾嗚呼哀哉尚饗

祭汪聖錫尚書文

維淳熙三年歲次丙申二月丁丑朔具位周某謹以清酌庶羞之奠敬祭於故端明學士尚書汪公之靈嗚呼景德祥符之際嘉祐治平之前紛群才之卓犖瑞聖世之聯翩皆學優於少壯而名重於回旋人望之而莫敢輕國恃之而無所愆迄鞏固於丕基豈不賴夫儒先逮南渡之中興嘉此風之浸還雖議論其或殊咸望道而勉旃公纔隣於弱冠已接武於英躔惟聞一而知十故人百而已千學日成而名日尊志彌勵而操彌堅宜受

知於兩朝更六卿與十連謂主盟於斯文遂翰旋於化甄倏淪亡於砥柱空嗟咨於逝川嗚呼哀哉天之生公謂無意耶何逢時之早而降才之全謂有意耶何初若成就而終於棄捐萃彼蒼之難問徒傷心而涕漣公既深知我之愚我豈不知公之賢蓋經世之慮至遠抑愛君之心甚專汲：乎惟恐一士之或遺教：乎惟憂正論之或偏為善急於飢渴排姦甚於鷹鷂寧見嫉乎斯世終守道而不遷人之知經攻傳註者遺意義公則越衆說之拘孿人之觀史究成敗者畧同異公則兼二者而磨研在朝廷則居今而行古臨征鎮則守經而與權

月登公集 卷之四 十一
暨食於家益全其天舉嗜好以咸無惟群書之貫穿凡
本朝人物議論之邪正暨歷代禮樂政刑之革沿紛紜
如百氏之異學叢脞如故家之遺篇無一事之不考無
一書之不傳位已躋於二品居未謀於隻椽豈常情之
能測度而世利之所拘牽縱弗登於耄期寧不於華顛
奚精明之未減乃遇疾而沉綿雖間親於藥石猶日舒
於簡編甫占書以貽我俄隱几而終焉觀學力之如斯
信古人之與肩嗚呼哀哉自公之退也有毀有譽而是
非則可攷矣及公之歿也無愛無憎而莫不為之悽然
乃知公論固已定於今日所謂好惡亦可待夫百年寄

悲悼於一奠耿千慮而莫宣嗚呼哀哉

經筵同僚祭范西叔仲芑侍講文

程侍郎大昌

程少卿叔達

蕭舍人燧

維淳熙三年歲次丙申十一月壬寅朔十九日庚申朝
散大夫試尚書兵部侍郎兼侍讀兼直學士院兼太子
詹事管城縣開國男食邑三百戶賜紫金魚袋周某等
謹以清酌庶羞之奠致祭於故侍講諫議范公之靈恭
惟本朝世納諫諍有若范氏直臣相望在仁祖時忠文
著節熙寧盛際榮國有聞暨太史公顯於元祐清規直
道宏議正辭紀於信書播在衆口三宗致治三賢與焉

中間寂寥既八十載源深流洄公興酌之萬里來朝結
知真主烏臺騎省言聽諫行風采凜然聲徽籍甚得時
與位綽有祖風惟祿及年云胡不逮上心震悼朝論嗟
咨某等並侍經幃幸聯僚契聞講禹貢服公淹該音吐
琅然今猶在耳豈期踰月遽哭喪舟酒肴雖微情則無
已嗚呼哀哉

宮僚祭揚信伯恂工部文

程少卿叔達
林祭酒光朝

蕭左史燧

維淳熙三年歲次丙申十二月壬申朔十日辛巳朝散
大夫試尚書兵部侍郎兼侍讀兼直學士院兼太子詹

事周某等謹專人以清酌庶羞之奠致祭於故提舉工
部信伯揚公之靈嗚呼信伯有高明之資有淵源之學
有正大之論有精白之心其事公卿敬而不諂其待交
友誠而不苟抱能若斯從政何有乃者僂游中秘思試
外庸而四牡未馳遽先朝露一區方卜已闋夜臺人皆
傷心公固齋志某等或嘗僚太史或共事承華念別日
之幾何悵終天之已矣一酌遙致九原倘聞嗚呼哀哉

祭劉汝一度諫議文

維淳熙五年歲次戊戌二月丙寅朔十日乙亥具位周
某謹遣人以清酌庶羞之奠致祭於故諫議殿撰劉公

之靈惟公學博而醇氣和而剛文掩衆俊行高一鄉石
林之葉龍溪之汪謂公晁董交飛薦章迨其仕矣或抑
或揚晚登諫垣聲譽孔彰飛龍在天進佩水蒼主聖臣
直疏盈皂囊雖分左符宸眷未忘論議之華儒林以光
於漳於婺蘇枯弱強上欲用公：足弗良八帙甫開奄
兮淪七位非不顯年非不長有藟莫施寧隱且殤士夫
太息我涕用滂念昔瀛洲分校鉛黃直則並舍歸則連
墻今烏百里莫奠公喪無窮之恨遇寓此一觴嗚呼哀
哉

祭莫子齊舍人文

同學士院權
直崔大雅

維淳熙五年歲次戊戌十二月庚寅朔四日癸巳翰林
學士中奉大夫知制誥兼侍讀兼太子詹事兼修國史
管城縣開國子食邑五百戶賜紫金魚袋周某等謹以
清酌蔬食之奠敢昭告於故直院中書舍人莫公之靈
惟公行飭文敏內剛外和名重月評秀發儒科入為王
官退食委蛇恂：寡言鮮或譏訶見義則為勇敢橫戈
介卿列監禁掖鑿坡再至三至人歎蹉跎乃心怡然守
道無頗往禪王藩譽問孔多於溫於泉中和可歌召登
從班進賢哉：區薄之故嬰此微疴賜告於家禮殊紫
荷鼎中草制文尚傾河甫息在林遽隨逝波播紳駭聞

爭以為訛謂仁必壽豈知其^他矧伊雙鬢亦云未皤奄忽
如斯天理則那吾徒為僚方賴切磋脯醢之奠胡為駢
羅酌觴再拜有淚滂沱嗚呼哀哉

祭婁寬夫文

維淳熙六年歲次己亥六月戊子朔十三日庚子具位
周某謹以清酌家蔬之奠致祭於故寬夫知縣婁公之
靈嗟乎寬夫心莊而貌舒行飭而才敷自策名於乙科
即結綬於中都屬製錦以來歸聚身章之銀朱期壽祿
之方昌胡暴疾而弗蘇庭有耄老之親室存幼稚之孤
謂作善其降祥嗟至此兮何辜紛太息於路人矧綢繆

於鄉閭寄郊闈之一酌悵悲懷之莫攄嗚呼哀哉尚享

同年祭何誠甫司業文

淳熙六年七月三日

維年月日具位周某等謹以清酌蔬食之奠致祭於故
司業何公誠甫年兄之靈嗚呼士之毀譽莫嚴于月旦
之評莫切於師儒之職况永嘉夙號士鄉而太學又公
論所自出耶今公由少至老一邦之人推為君子長者
及官成均士皆心悅誠服初未嘗峻規矩厲聲色也行
已立朝譽望如此則其問學之富涵養之厚豈易測哉
然而位終止于六品不可謂之滿能壽僅踰於耳順不
可謂之稱德此播紳鄉閭所以齋咨涕洟為國惜賢而

不能自釋也况吾徒託同年同朝之契相與款密者乎
奠觴雖微情則何極嗚呼哀哉

同年祭李子茂木舍人文
陳兵部庸 杜左司
民表 閔侍郎 蒼舒

陳戶部居仁

維淳熙六年歲次己亥十二月甲申朔十八日辛丑具
位周某等謹以清酌齋蔬之奠敬祭於故左史中書舍
人同年子茂李公之靈嗚呼惟公學通古今名重鄉黨
言游膠庠聞見日廣其詞可宗其行可仰事於王朝宜
矣天獎蘭臺粉闈方振逸響螭階夾侍鷗閣參掌日朝
未央衣振容爽甲午之晨天門跌蕩同僚顧言左史安

往或云逝矣衆色悵：曰未嘗疾斯言豈誰走問其家
嘻已屬續藥不及施語不及兩斯須之間遂隔幽壤賓
朋哭弔相視恻恍矧如吾徒叨綴虎榜夙承清規忍觀
遺像聊陳豆觴敬叙疇曩嗚呼哀哉

祭張敬夫殿撰文

維淳熙七年歲次庚子三月癸丑朔十九日辛未具位
周某謹遣人以清酌庶羞之奠致祭於故右文殿修撰
南軒張兄之靈嗚呼天生蒸民受中惟一或哲或愚則
係其習嗟吾敬夫氣稟剛直能擴而克又學之力發揮
伊洛排斥老釋有德有言後來所式平生忠孝如嗜飲

食其遠佞邪則猶鬼域念昔先正心在王室恢圖之功
曷敢不力根本如固折衝可必天子是嘉選鎮南國訓
兵劭農他則違恤孰云盛年而抱沉疾易箒之際爽靈
不惑遺疏悽：孔明是匹伸紙疾書遂以絕筆朝之忠
良士之準的今也兩亡孰不心惻矧伊無似夙賴三益
莫視絞衾莫相窀穸遙致奠觴悲來填臆嗚呼哀哉尚
饗

祭從母王碩人文

維淳熙七年歲次庚子九月庚戌朔九日戊午甥具位
周某謹遣保義郎克本府主管進奉劉晟以清酌蔬食

之奠敬祭於從母太碩人王氏之靈嗚呼外王父息女
有歸者六人太碩人其孟也諸季不幸往：早世父者
已五六年近亦三四年矣惟太碩人富貴壽考歸
然獨存有德有年有子有孫歲瀕九十乃以疾逝五福
具備可謂盛哉其以孺然孤甥夙荷憐撫不侍顏色於
今九年念外家之日微傷永感之歲久聞訃痛絕不知
哀涕之橫流也屬有列於朝無由拊棺一慟遙致奠酌
肝心為摧嗚呼哀哉

祭呂伯恭禮部文

維淳熙八年歲次辛丑九月甲戌朔二十五日戊戌通

奉大夫叅知政事周某謹遣人以清酌庶羞之奠祭致
於亡友明道直閣禮部伯恭呂君之靈嗚呼伯恭河嶽
之英公卿之裔躬蹈五常心潛六藝學富而醇文敏而
麗通今不流博古不泥高明之識力去其蔽卓絕之行
亦矜其細他人有一自足名世惟君兼之夫孰能儼蟬
聯簪紱芥拾科第堂：申公謂且克繼皇心是嘉召寘
班綴成均博約館閣滯南宮表章史觀凡例主盟斯
文每食忘噉風淫末疾乘厥勞勩歸哉亳祠可以自憇
鑽堅仰高講習彌勵曾不息黜曾不補劓竟隕其生壽
夭誰制萬斛之舟江海期濟觸石而傾未皇鼓柝千年

之木棟梁可計遇風而摧乃萎薪桂才也何多命也何
戾生徒滿門相向雪涕播紳諸儒咸惜其逝矧伊鄙夫
辱在交契姓不同耳心則魯衛易簣莫親臨穴莫祭寄
辭西風揮北哀涕嗚呼哀哉

祭芮國瑞尚書文

維淳熙九年歲次壬寅六月庚子朔二十二日辛酉通
奉大夫叅知政事周某謹遣承節郎幹辦府張佐以清
酌蔬食之奠致祭於故侍讀國史尚書芮公之靈嗚呼
惟公才學兼優弟兄競爽聲震膠庠評高鄉黨伯也先
逝公譽日廣徧持使節明燭幽枉晚踐禁塗殫竭忠謹

乃心王事浸失願養方聞予告而遽長往遺占入奏天
語嗟惘賻禮有加眷知可想念言孤蹤託契疇曩累日
不見遂隔黃壤寄情奠觴揮淚泚頽嗚呼哀哉

祭外祖王給事家諸塋

維淳熙十年歲次癸卯十月壬辰朔外孫具位周某謹
遣使臣李椿以清酌庶羞之奠敬祭於外祖給事待制
贈少保王公外祖母衛國夫人宋氏亡舅通判二十八
大夫亡妣宜人韓氏之塋恭惟外氏昔為大家今茲立
壠近在陽羨而祚嗣湮替宿草弗除某繫官於朝末由
拜掃孟冬之朔俗重祭奠遙伸奠酌不勝凱風寒泉之

思伏惟尚饗

祭陳應求俊卿丞相文

維淳熙十四年十二月戊辰朔具位周某某謹以清酌庶
羞之奠致祭於故太保大觀文魏國正獻陳公之靈惟
公德業純備哀榮終始譽滿四海行書太史獨餘易名
疇敢溢美矧公好謙遺戒毋誅上實命之厥有深旨於
皇本朝賢輔接踵為正若獻三人而已往在慶曆初公
宅揆忠清諒直庶頑仁鄙用雖日淺名則千祀元祐之
初政歸呂氏挈國紀綱養士廉耻公卿景從夷夏風靡
後暨清源羽翼端即迨其入相有譽無毀生全寵光沒

厚恩紀自是厥後鮮矣斯比堂：魏公聲望崛起如杜
如呂佐我天子甘盤舊學視何有煒知臣者君人以倫
擬借曰形容辭之贅矣言念晚生叨附雋軌大明初升
詞掖之使嘗代匠斲汗顏血指二十六年言猶在耳期
公壽考與宋無武孰云微疾遂隔生死殄瘁之悲豈為
知己情馳一觴目斷千里嗚呼哀哉

祭袁州兄嫂文

維淳熙十六年歲次己酉十月己亥朔十六日甲寅具
位弟周某謹以清酌庶羞之奠致祭於大兄袁州太守
大嫂安人王氏之塋惟兄仁義槩秉彝於天又濟之以

家傳處則孝弟恭肅為州閭之楷式出則公勤廉敏而
於國事尤拳：焉故搢紳舊朋罔不稱其德塗巷小夫
亦能知其賢茲固公論有不可掩而非兄弟之私言也
自邑而倅由倅而守人方期於九遷而不肖之弟叨備
二府遂決意於林泉識與不識皆曰外當付以使節入
當陪於適聯某既惜已而忘內舉之誼彼侍從近臣雖
誦言其可薦亦未免指某以為嫌使兄有撥繁治劇之
才而不獲展有致君澤民之志而不及宣嗟天命之難
謀復嗇壽於百年急難之義告歸宜適愧屢請之弗俞
歷七載而遷延逮奉祀於故里始展墓於新阡區：本

志夫豈其然蓋將晚歲芒屨竹杖從兄於青原白露之上乃今觴酒豆肉哭兄于荒烟野草之間是宜肝心之糜潰何止泣涕之漣而已嗚呼哀哉

祭繹姪文

維淳熙十六年歲次己酉十月丁亥朔十六日壬寅叔具位以清酌庶羞之奠祭於亡姪小一郎及婦胡氏之塋吾姪事親孝謹行已恭敬輔以問學宜貴與永顧乃名不登於仕籍年弗逮於知命雖天理之難推亦吾門之不幸屬纊之際遺書來諭痛親養而託孤知中心之炯何斯人而斯疾重予懷之耿逮得請而來歸已

嚴霜之七隕酌一觴以忘言紛填胸之悲憤嗚呼哀哉

祭呂帳幹文

維紹熙元年歲次庚戌三月乙卯二十四日戊寅具位周某謹遣使臣文立方以清酌庶羞之奠致祭於娣夫帳幹文林呂公之塋某去秋歸自浙西亟欲躬走墓道非間于風雨則有病疾因循累月未能遂區區之志消辰代禮尚其鑒享

祭叔母李氏孺人文

維紹熙元年歲次庚戌三月乙卯朔二十四日戊寅姪具位周某謹遣使臣文立方以清酌庶羞之奠敬祭於

叔母孺人李氏之塋某去秋歸自浙西亟欲躬走墓道
而非間於風雨則有疾病因循累月未能遂區區之志
今夏序將臨大懼以稽緩獲罪於幽涓辰代禮良非得
已仰惟淑靈俯賜鑒享

祭蔣叅議文

維紹熙三年歲次壬子三月甲戌朔十二日乙酉具位
周某謹以清酌庶羞之奠致祭於故參議朝奉蔣君之
靈惟君廉勤急愨莊重坦夷上介之除我與聞之來分
藩符君已之幕耄雖將及見為矍鑠孰云歲徂君年與
凋識者嗟悼况於同僚翩者旌遙指鄞水目送歸艍

一觴永已

省齋文稿卷第三十八 終

省齋文藁卷第三十九

周益文忠公集三十九

家廟墳山祝文

信州茶山初贈焚黃祝文

紹興三十二年

嗟乎某不孝之罪上通於天一去松楸十二年於茲矣
 祿不及養仕則何心其所以遲：不去者徒以先公早
 世未通閭籍而母氏之邑封未啟也今賴教訓承遺蔭
 備官於朝黃緣幸會去歲秋今歲之夏二聖游霈鴻恩覃
 及幽顯故期月之間王命告第者再可謂寵矣惟是密
 章法當焚諸墓下而某不孝滋甚未能果於引去又不
 能稽留於家謹因兄將仕即某西歸先以初贈致告

展省茶山焚黃祝文

維隆興元年歲次癸未五月辛卯朔十八日戊申男左
奉議郎主管台州崇道觀周某謹以清酌庶羞之奠敢
昭告於先妣安人王氏之塋恭惟國家每下赦令則許
廷臣追褒其父母是豈惟教孝而慰夫生者哉抑冥漠
實有望焉故昔贈典始下而某之婦之乳獲夜夢先夫
人若謝恩於天而宗族咸會者彼未嘗逮事先夫人也
而能言容貌服飾之大畧此固非想非因而先夫人實
有以啟其衷而告之享也某其敢稽留密章以久鬱先
夫人之望故涉春求歸甚力蒙上憫憐乃今賜以如欲

先夫人庶或鑒之雖然某失慈訓十有三年僅得一官
以展省立墓今又十三年矣然後能躬致王命惟不孝
不恭歲久禮愆雖擢髮不足以數其罪顧何以塞人子
之責念咎而痛心追遠而隕涕文可盡也哀其有既耶

鳳山焚黃祝文

乾道元年

惟我皇考才德譽望傑出萬夫之上而宦遊不遂壽考
不究實惟有子積躓而至於斯嗚呼某尚忍言哉近者
幸逢郊霽有詔皇考階冠七品敬用劬勞之日恭致告
焚於墓下豈足以贖不孝之萬一姑達上命而已

茶山告至祝文

乾道二年十月

某不奉墓祭又閱四期千里而來敬伸拜掃其在哀悃
續具以告

茶山告啟殯祝文 乾道二年十一月一日

昔我皇妣棄世於上饒不肖之孤未能自立就葬茶山
蓋二十有九載惟祖父棲神廬陵子孫家焉亦有年數
獨望妣塋千里而遙上塚之使雖以時遣大懼不孝不
度弗親奠酌弗視松栢無以伸人子之敬而永無窮之
傳是用不敢寧居經營歸窆仲冬庚戌將啟殯宮前期
十日設次以俟明靈如在體魄無驚謹告

茶山啟殯祝文

維乾道二年歲次丙戌十一月辛丑朔初十日庚戌哀
子具位周某謹以清酌庶羞之奠祭於皇妣安人王氏
二十七娘子之塋某向以拜掃不時謀奉神柩言歸廬
陵庶使子孫奕世常瞻松栢不乏時祭越朔旦具述寸
誠謹於是日庀工歲事捨舊即新皇妣必安之

考妣焚黃祝文 乾道四年三月

乃去冬至日天子推躬郊之慶文武臣皆得追縈其親
我皇考於是有六品之贈夫生而位不滿德既沒爵命
乃屢加焉雖宗族搢紳猶齎咨以為恨矧如不肖之孤
其痛豈有涯哉某自惟天罰至深不及伸負米之養上

賴邦榮加厚乃屢錫漏泉之恩捧密印以告幽想慈顏而增慕恭陳薄奠用致哀誠

考妣焚黃祝文 乾道六年

在歲庚寅天子郊見上帝某適貳秘書蓬國大慶肆我皇考恩冠六品皇妣亦進封一等繫官朝列阻濶斧封近者奉祠來歸乃克恭致告第之命興言孤露久矣不天繫先德之甚濃庶邦榮之未艾

奉祠歸告至先塋祝文

維乾道八年歲次壬辰六月戊戌朔二十九日丙寅具位周某謹以清酌庶羞之奠敢昭告於某塋某備官於尚饗

焚黃告祖塋祝文

乾道八年十一月九日

裕垂於先則慶積於後不易之理也前歲郊禋上澤周普考妣於是有加贈之典揆厥所元其亦遠矣茲焚蜜章不敢不告

先考加贈左中奉大夫焚黃祝文

維淳熙元年歲次甲午十月乙酉朔嗣子左朝請即克右文殿修撰提舉江州太平興國宮某謹以清酌庶羞之奠及左中奉大夫告一通告於先考奉使博士贈中

奉大夫之靈曰某之不天可謂甚矣既未嘗躬一日之
養又無以伸罔極之報興言及此不如無生茲賴郊恩
大加贈典雖朝廷德澤亦云厚矣而人子愴慕豈有涯
哉既焚窆章不敢不告尚饗

先妣加贈令人焚黃祝文

維淳熙元年

下云云全前

謹以清酌庶羞之奠及令人

告一通告於先妣令人王氏之靈曰念昔童中頑無識
知獨賴慈母三遷之教俾不隕其世業暨叨一命曾弗
獲捧檄負米昭訓誨之有自况能酬顧復之大恩哉嗟
乎欲養而親不待欲報而天罔極此所以每逢郊賚之

追崇不知涕泗之橫集也尚饗

初除叅政贈三代東宮三少告廟祝文

維淳熙七年歲次庚子七月辛亥朔曾孫通議大夫叅
知政事滎陽郡開國侯食邑一千二百戶食實封一百
戶周某謹以清酌庶羞之奠敢昭告於曾祖朝奉郎贈
太子少保曾祖妣宜春郡夫人郭氏先祖朝散大夫贈
太子少傅祖妣江華郡夫人潘氏祖妣隴西郡夫人李
氏祖妣清河郡夫人張氏先考奉使博士贈太子少師
先妣廬陵郡夫人王氏維昔曾大父力以詩書教子孫
相繼登進士第雖粗享祿養而德業弗彰於世肆大父

仕宦三十年未嘗一預堂選其恬於進取如此至我先人以文學早冠多士聲譽震於四方然官弗通朝籍年弗登強仕益慶積而不耀其躬施厚而不求其報於今三世乃俾小子承是休顯蒙上拔擢預聞機政以有東宮三少之贈發潛德昭遺澤天也小子何預焉嗚呼祿不及親曷敢謂之榮才不稱位曷敢謂之寵命書既下告虔而已伏惟尚饗

明堂加贈三代東宮三太告廟祝文

維淳熙九年歲次壬寅十月戊戌朔十九日丙辰曾孫具位某謹以清酌庶羞之奠敢昭告於曾祖朝奉郎贈

太子太保曾祖妣博平郡夫人郭氏先祖朝散大夫贈太子太傅祖妣定襄郡夫人潘氏河內郡夫人李氏沂陽郡夫人張氏先考奉使博士贈太子太師先妣臨汝郡夫人王氏某仰承遺澤脩敷政途恭值明堂禮成思及三世東宮二品次郡小君舉為寵章以貴家廟綸言初錫敢不虔告謹告

初除知院加贈三代三少告廟祝文

維淳熙九年歲次壬寅十二月丁酉朔二十一日丁巳曾孫通奉大夫知樞密院事周某謹以清酌之奠敢昭告於曾祖少保曾祖妣虢國夫人郭氏先祖少傅祖妣

用益公集 卷之九 禮部
鞏國夫人潘氏祖妣隴國夫人李氏祖妣薛國夫人張
氏先考奉使博士贈少師先妣吉國夫人王氏某蒙上
異恩躡登西府追崇有典用寵其先孤棘國封覃延三
世遐瞻立墓阻致告焚燬其絲綸增賁家廟涓辰啟白
兼集哀榮謹告

初除樞密院使加贈三代三公告廟祝文

維淳熙十一年歲次甲辰七月丁亥朔初三日己丑曾
孫通奉大夫樞密使周某謹以清酌之奠敢昭告於曾
祖太保曾祖妣華國夫人郭氏先祖太傅祖妣代國夫
人潘氏涇國夫人李氏衛國夫人張氏先考太師先妣
相國夫人王氏某再歲本兵毫厘無補驟蒙獎擢躡正
使名固出上恩實資先德斧封在遠阻致告焚式涓良
辰先告於廟哀榮既至感慕隨之伏惟尚饗

曾祖曾祖妣焚黃祝文

維淳熙十一年歲次甲辰十月丙辰朔曾孫通奉大夫
樞密使滎陽郡開國公食邑三千六百戶實封一千戶
周某謹以清酌庶羞之奠及太子少保太子太保少保
太保宜春郡博平郡夫人魏國華國夫人黃告八通告
於曾祖太保曾祖母華國夫人郭氏之靈曰某零丁孤
苦生值多艱先世立墓淪於異域每一念此未嘗不痛

心疾首也庚子之夏叨預政機壬寅季秋進長西府仍
值明堂慶霽覃及幽顯今復叨被恩渥就陞使名皆蒙
寵章褒錫三世於是曾大父自東宮三少四轉而至公
保曾祖母歷郡夫人國夫人者皆至於再鈿軸錦囊既
藏家廟告幽有詔無由躬致墓道惟鳳山之原無違之
堂遙安神棲為日已久謹因初寒令節命弟迪功郎新
永州司戶叅軍必先以告尚饗

祖妣焚黃祝文

維淳熙十一年歲次甲辰十月丙辰朔孫通奉大夫樞
密使滎陽郡開國公食邑三千六百戶實封一千戶周

某謹以清酌庶羞之奠及太子少傅太子太傅少傅太
傅江華定襄郡鞏國代國夫人隴西沂陽郡隴國涇國
夫人清河內郡薛國衛國夫人黃告十六通告於先
祖太傅祖妣代國夫人潘氏祖妣涇國夫人李氏祖妣
衛國夫人張氏之靈曰恭惟王父以經術起家以仁厚
從政而廉於進取終身銓部豐積嗇取留遺後嗣俾某
冒膺上眷備位貳府自庚子夏以迄於今三被進擢一
值宗祀恩章四頒俾伸尊祖之志於是王父自太子少
傅為公為孤三祖母兩啟郡封再君列國詔函之下各
至於四追褒之旨具載訓辭屬秉事樞不獲躬拜墓下

謹遣弟迪功郎新永州司戶參軍必先以告尚饗

先考大中丞太師焚黃祝文

維淳熙十一年歲次甲辰十月丙辰朔男通奉大夫樞
密使滎陽^郡開國公食邑三千六百戶實封一千戶周某
謹以清酌庶羞之奠及大中通議通奉正議正奉宣奉
大夫太子少師太子太師少師太師黃告十通告於考^先
太師之靈曰某不肖無以繼先志不天弗獲伸祿養猥
憑遺烈蒙國厚恩久列侍從遂參輔弼十年之間無歲
不被追崇之典蓋自淳熙三祀以少司馬驟乘於郊明
年入翰林為學士又明年陞中奉既而兩遷尚書一值

宗祀於是皇考由大中大夫六轉而為宣奉大夫七年
叨陪大政九年再值秋享仍長西府又二年擢正使名
於是皇考歷官師冠三公寵章皆至具存告第之書屬
官有常守多歷歲月無由躬望塋域敬致君命夙夜涕
慕懼以不孝獲戾謹遣弟迪功郎新永州司戶參軍必
先以告尚饗

先妣焚黃祝文

維淳熙^{同前}之奠及碩人淑人廬陵臨汝郡吉國相國
夫人黃告六通告於先妣相國夫人王氏之靈曰某向
以自吉徂信展墓失時爰即寓邦改卜兆域而貪祿忘

歸阻望松楸者十年矣不孝不虔為罪滋大粵自淳熙
三祀恭值郊需明年冒登翰苑於是皇妣有碩人淑人
之封厥後忝預政事一經宗祀再遷樞庭於是皇妣有
兩郡兩國小君之贈恭惟聖主之恩游及泉壤而其於
公未有秋毫之報於私又闕拜掃之禮而又稽留詔命
夙夜滋不皇安謹遣弟 同前

郊祀加封三代告廟祝文

維淳熙十三年歲次丙午正月庚辰朔十九日戊戌曾
孫具位某謹以清酌庶羞之奠敢昭告於曾祖太傅曾
祖妣周國夫人郭氏先祖太師祖妣荆國夫人潘氏祖

妣益國夫人李氏祖妣鄧國夫人張氏先考太師呂國
公先妣莒國夫人王氏去歲冬至日天子親執圭幣郊
見上帝大賚四海澤及乎幽明某備位西府實相厥事
恩章加厚覃延三世師傅之官列國之封王言如綸粲
其盈軸雖未獲躬拜墓道而告虔家廟其曷敢緩是涓
吉旦敬致上命伏惟明靈如在實嘉饗之謹告

進秩加恩謝家廟祝文 淳熙十三年

某比緣郊祀禮成例加封邑又因書德壽宮尊號冊文
蒙恩進秩一等仍行戶祖謹涓穀旦致謝於家謹告

遷相府告廟祝文 淳熙十四年

某仰憑先德叨冒恩除將以甲寅吉辰敬奉神主遷於
東府謹告

入府告廟祝文 淳熙十四年

某茲奉版位遷於相府俟消吉旦別伸祭享謹先以告
伏惟昭鑒

拜右相三代加贈告廟祝文

維淳熙十四年歲次丁未四月壬申朔曾孫具位謹以
清酌庶羞之奠并燒化銀錢駝擔等敢昭告於曾祖太
師曾祖妣魯國夫人郭氏先祖太師絳國公祖妣雍國
夫人潘氏祖妣兗國夫人李氏祖妣豫國夫人張氏亡

伯運使正奉伯母碩人尚氏先考太師鄭國公先妣冀
國夫人王氏亡弟子柔十解元某仰憑世德進位宰司
穆卜辰良入居新第恩加三世爵秩俱隆夏序將臨時
推穀旦爰修祀事敬致綸言庶其安安永燾厥後伏惟
尚饗

明堂三代加贈告廟祝文

維淳熙十五年歲次戊申十月癸亥朔曾孫 具位 周某
謹以茶酒之奠謹告於曾祖太師追封萊國公曾祖妣
改封燕國夫人郭氏先祖太師改封代國公祖妣改封
楚國夫人潘氏祖妣改封陳國夫人李氏祖妣改封益

國夫人張氏先考太師改封邠國公先妣改封邠國夫人王氏適者天子大饗明堂某叨備宰司實首使領七戒三齋以迄於成匪賴先德疇克臻此今赦恩溥博追崇三世公去之爵遂及曾門贊書褒嘉綸告華煥雖未獲躬拜墓下敬致上命謹差穀旦酌以告幽伏惟明靈克享光寵永燾厥後謹告

遷左府告廟祝文

維淳熙十六年歲次己酉二月辛酉朔初十日庚午曾孫具位周某謹以清酌之奠敢昭告於曾祖太師萊國公曾祖妣燕國夫人郭氏先祖太師代國公祖妣楚國

夫人潘氏祖妣陳國夫人李氏祖妣益國夫人張氏先考太師邠國公先妣邠國夫人王氏伯考運使光祿伯母廬陵郡夫人尚氏暨止弟子柔十解元某比叨恩擢序陟冢司能薄位高實憑先德徙舍三日奉安神棲惟寧攸居斯裕於後謹告

拜左相三代加贈告廟祝文

維淳熙十六年歲次己酉二月辛酉朔十七日丁丑曾孫具位周某謹以清酌之奠敢昭告於曾祖太師鄭國公曾祖妣漢國夫人郭氏先祖太師漢國公祖妣漢國夫人潘氏祖妣漢國夫人李氏祖妣漢國夫人張氏先考

太師漢國公先妣漢國夫人王氏某仰憑遺蔭被遇壽皇相位二年未伸薄効延登左輔益愧超踰天澤漏泉游加三世寵章維厚備載綸言爰卜令辰具陳家廟焚黃未遂有惻於心謹告

光宗登極三代加贈告廟祝文

維淳熙十六年歲次己酉四月辛酉朔曾孫具位周某謹以清酌庶羞之奠敢昭告於曾祖太師魏國公曾祖妣魏國夫人郭氏先祖太師魏國公祖妣魏國夫人潘氏祖妣魏_國夫人李氏祖妣魏國夫人張氏伯考運使金紫伯母河內郡夫人尚氏先考太師魏國公先妣魏國

夫人王氏乃二月壬戌新天子以壽皇之命履帝之位越三日甲子大赦天下凡文武臣父母生者封歿者贈益異恩也某於斯時幸備位宰輔澤及三世俱改封於大國匪繇先烈孰對邦榮謹涓穀旦陳命書於廟而敬致上命伏惟尚饗

奉祠歸廬陵告至長岡祝文

維淳熙十六年歲次己酉九月戊午朔十四日辛未男具位某謹以茶酒之奠敢昭告於先妣魏國夫人王氏之塋某入仕於朝十有五年乃得奉祠歸展墓道方將蠲日之吉敬陳祭奠茲用先行告至之禮伏惟歆鑒

曾祖曾祖妣焚黃祝文

維淳熙十六年歲次己酉十月丁亥朔十一日丁酉曾孫具位某謹以清酌庶羞之奠及太傅太師萊國公鄭國公魏國公周國夫人魯國夫人燕國夫人漢國夫人魏國夫人告十通敬祭於曾祖太師魏國公曾祖妣魏國夫人郭氏之靈曰某忝侗不肖遠賴先德被遇兩朝更踐二府褒贈及於三世不一而足粵自淳熙甲辰十月嘗命弟必先以黃告八通即無違堂而告諸幽矣厥後乙己之冬國家南郊禮成時則有太傅暨周國之命丁未之春某叨右相時則有太師暨魯國之封戊申之

秋天子大饗明堂時則有萊國啟土燕國改封之詔逮己酉正月恩遷左揆於是曾祖進封於鄭實惟鄉國祖妣進封於漢愈為大邦今年二月今上受禪然後曾祖祖妣始獲並封於魏：大名也儲祉燾後庶其在此屬某罷政來歸涓日以致上命雖松楸淪陷異域展省愆邈然神依寓邦其亦久矣奉觴以告榮不勝哀尚饗

祖：妣焚黃祝文

維淳熙 年月日同前 孫具位某謹以清酌庶羞之奠并告命二十通敬祭於先祖初贈太師次封絳國公次封代國公次封漢國公今封魏國公祖妣潘氏歷封荆雍

楚漢魏五國夫人祖妣李氏歷封益陳漢魏五國夫人祖妣張氏歷封鄧豫益漢魏五國夫人之靈某備位鈞樞殆且十載愧無毫髮可報上恩而澤及其先有加無已自甲辰冬命弟必先持褒贈之典告於幽壤逮今又五年矣其間乙巳之躬郊戊申之秋享己酉之登極及某自西府登右揆遷左相皆沿舊典恩錫封爵師垣大國極其寵榮今者奉祠來歸得以躬行三獻之禮敬致兩朝之命明靈在上如顧如歆尚饗

鳳山焚黃祝文

維淳熙

年月日同前

嗣子具位周某謹以清酌庶羞之

奠及苕鄭邠漢魏國公告身五通告於皇考太師魏國公之塋曰某自乙未春入朝至己酉夏罷政十五年間賴遺澤叨獎擢由侍從而忝輔相值大禮而遇覃霈皆有恩典褒贈其親三公大邦遂極一品甲辰之冬嘗因堂弟必先調官西歸就以黃告十通燎於墓道其後寵命繼頒積至四五今幸奉祠來歸始得執觴豆陳詔函躬展焚黃之禮凡先後所遇之恩與夫發揚潛德之美已具載於訓詞惟是養不及於生前寵乃加於後世茲榮也祇所以為哀而已伏惟尚饗

長岡焚黃祝文

維淳熙 年月日同前 嗣子具位周某謹以清酌庶羞之

奠及苜蓿芻漢魏國夫人告身五通告於先妣魏國夫

人王氏之塋曰某自乙未春入朝 同前 皆有恩典褒贈

其親正位小君有年於此甲辰之冬因堂弟必先西歸

嘗以黃告六通燎於墓道其後寵命繼頒 同前

焚黃告伯考伯母祝文

維淳熙 年月日同前 姪具位周某謹以清酌庶羞之奠

敢昭告於伯考運使金紫伯母河內郡夫人尚氏某十

載政塗敷被恩遷且屢逢邦慶於是曾祖及父皆贈

太師魏國公而曾祖妣祖妣皆追封魏國夫人今者

罷政來歸涓吉焚黃於鳳山之原兆域相望不敢不告

尚享

奉安家廟祝文

維淳熙十六年歲次己酉十月丁亥朔二十二日戊申

曾孫具位周某謹以茶酒之奠敢昭告於曾祖太師魏

國公曾祖妣魏國夫人郭氏祖太師魏國公祖妣魏國

夫人潘氏祖妣魏國夫人李氏祖妣魏國夫人張氏伯

考運使金紫伯妣河內郡夫人尚氏考太師魏國公妣

魏國夫人王氏暨十弟解元某自今歲五月八日罷相

去朝少留陽羨已由浙西入江東泝流以歸半年之

周益公集 卷之五 告
之間跋履川塗經涉時序雖香火莫敢或廢大懼旅次
祭享有闕今甫奠居載崇家廟神靈如在尚祈顧歆謹
告

除少保三代加贈唐國公唐國夫人祝文

維紹熙元年歲次庚戌十一月辛亥朔十五日乙丑曾
孫具位周某謹以茶酒之奠敢昭告於曾祖太師魏國
公今改封唐國公曾祖妣魏國夫人郭氏今改封唐國
夫人祖太師魏國公今改封唐國公祖妣魏國夫人潘
氏今改封唐國夫人祖妣魏國夫人李氏今改封唐國
夫人祖妣魏國夫人張氏今改封唐國夫人考太師魏

國公今改封唐國公妣魏國夫人王氏今改封唐國夫
人某十載改塗屢逢霈澤恩逮三世疊封大國寵榮至
矣去春進位亞保復當追崇自魏而唐庶因堯之遺風
假寵私廟尋以非才請罷政事而言者力攻其後以是
告第之書久之方下謹於冬至時享之前涓吉以告伏
惟尚饗

長沙視事告廟祝文

紹熙二年十一月二十七日

某比膺綸命來鎮湘楚乙丑己交帥事今茲復領郡章
方將涓吉安奉家廟先於是日敬告禮上之期伏惟尚
饗

冬至祝文

伏以長至今辰當修時祭屬方視印未安神棲穀醴薄
陳尚祈鑒饗

郊祀三代加贈潭國公潭國夫人祝文

維紹熙三年歲次壬子閏二月甲辰朔十四日丁巳曾
孫具位周某伏遇寒食令節謹以清酌庶羞之奠并三
代改封告命八通敢昭告於曾祖太師潭國公曾祖妣
潭國夫人郭氏祖太師潭國公祖妣潭國夫人潘氏祖
妣潭國夫人李氏祖妣潭國夫人張氏考太師潭國公
妣潭國夫人王氏某以去歲仲冬辛未視潭印章越翼

日壬申日南至天子郊見上帝肆大音於天下某備位
孤保逢此霈澤適在守藩之初且念先父昔常奉使湖
湘是用有請於朝就為三世賜履之地贊書甚寵未容
敬陳墓道謹因拜掃令序先致上命於家廟伏惟尚饗

省齋文稿卷第三十九 終

省齋文稿卷第四十

周益文忠公集四十

道釋

頌

偈

贊

題跋

說

疏

記

塔銘

甲申四月甲子夜夢以焦坑小團及宜春新芽送

隆慶長老了達戲作東云：矍然而寤枕上又

補一頌以茶送達數日前曾有此意而一點千

林非因想所及也

達上座惺：著靈根一點便通神敗葉千林都掃却夢

中戲作

睡起尋思鹿覆蕉更將惡水向人澆夢中妄語渾閒事

眼暈生花好一鉞

枕上補作

與崔序老步月青玉峽漱玉泉亭坐瀑布之石橋
天氣涼冷移坐法堂下對雙劍峰甚正序老
求偈

劍峰有時折瀑水有時竭我性等虛空今古無生滅

故慶雲長老文介贊

丙戌

七尺軀歸底處一尺素寫得住是真是假有眼看覷

彥岑真贊

石中韞着無瑕玉鑿裏淘成紫磨金八十年來岑鐵面
誰知一片老婆心

跋薌林贈陳丹林詩

右薌林向公贈陳丹林栖隱老詩一首公墓宰木既拱栖
隱亦蕩為太空久矣惟丹林即陳彥舉尚無恙予游閣
早始識之聽其語琅琅然讀其詩滔滔然與之奕戶甚
高飲之酒氣甚豪在異時道官中益拔萃者不然公之
蓮社寧容濫吹耶宮門黃冠無慮數十房有徒三四
多或八九彥舉咸無為懼其業之莫繼有徐彌高者奉
事積歲而力不足以登其名於祠曹予惻然念之損廬
阜祠俸為之唱廣文揚先生薌林老賓客今代風騷將
也適仕於此追次元韻以啟迪眾志矧公季子邵陽別
駕夙以賢業振宣先猷盤園居士昔維詩友方以暇日

大闢凌風之閣一覽是作悵然感舊能勿致力乎彥舉
往矣思賢尚友之士輕財樂施之家積篲成山其誰肯
後千金且不難致一度牒乎何有乾道九年十二月二
十日

助贖蕭惟清度牒戲書

廬陵道士蕭惟清以護身符質二百鏹於其徒坐此身
不能自如傍徨於都城予聞而憐之凡里人之仕朝者
調官者倘共助薄少使之贖舊物以歸蓋美事也惟清
能鼓琴賦詩他日脫樊籠翩然還鄉當用此二者為諸
君謝不亦樂乎乾道七年青原野夫戲書仍助錢二十

千

題僧志淮刺血書經

真金葉上銷琉璃汁書般若波羅蜜多寘四寶合成函
中具載藏經其來久矣安福縣寶珠院僧志淮力不足
以及此乃刺血書法華楞嚴圓覺諸經此古所謂貧女
布施也精勤獲報豈止琉璃汁哉紹興二年十一月三
日

跋妙喜遺筆

隆興癸未予自西掖奉祠去國以五月辛卯朔游徑山
見大慧禪師於明月堂南豐黃世永在焉說葛藤點鬼

簿凡三晝夜越甲午乃相別師令侍者了賢同世永送予至山下之無相院終十旬而師逝後四年當乾道丁亥十一月予過豫章值賢住上藍相與話舊甚款又一紀而賢沒於潭之石霜今復一星終而其師弟祖文攜此軸求跋語將寘之山門與裴公環筭共傳於世予謂分香賣履師之闕已多記劍刻舟予之癡歎滋甚更留話柄聊作笑端所云淨智居士即世永也其墓木已拱矣紹熙壬子五月七日省齋老人周某書

說
木觀音說

安成劉君澄命匠刻木觀音像數百軀遇好事者輒施

為同邑歐陽元泰以其一遺予且求予言將復於劉君夫妙音觀世音梵音海潮音勝彼世間音可聽也而謂之觀人固以為惑予非學佛者未達固宜至於易繫詞禮記大傳皆有聖人南面聽天下之語夫向明而治當云觀天下而以為聽正與釋氏相反是豈可不知其說哉予聞劉君兄弟踵登儒科貢於鄉者不絕家有三教堂奉事甚謹必能儒釋兼通盍往問焉他日復以告我紹熙元年十一月日

西峰寺緣化巖主殿疏

盧行者新州立塔鑪香却貫於曹溪海禪師二水涅槃

室宇元成於寶應恭惟大士夙眷西峯盤旋再閨之間
證悟一真之要去之二百十載靈應滋彰宜乎十萬餘
家歸依愈切雖粹容之儼設頽紺殿之久虛與其拆東
補西孰若將無作有打碎釋迦立起佛殿只是一僧供
養羅漢燒却木頭本非二致眾緣所在法施可凝

天華院佛殿造於太平興國戊寅踰二百載今
乃摧毀過者太息茲欲募緣修葺青原野夫
周某為題數語仍施薄少為之唱者 乾道六

年三月十三日

莊嚴佛事比立非得已而為捐棄私財長者亦見幾而

作况欲支傾補弊豈難積少成多眷此佛廬巋然古渡
茅蓋頭而寢壞蘆穿膝以誰憐山僧既已辦心檀施何
妨出力補故寺而獲二梵世尊之說不虛如貧女而施
一錢多生之報終在

記 新復報恩善生院記

廬陵郡西南六十里古有報恩善生精舍其廢已久政
和中寶嚴院僧永韶始命其徒宗式乞故額而興復之
人皆曰是不可為也宗式曰我必成之願舊基瀕溪將
為水壞宣和辛丑別卜大岡之趾遷焉其地益永韶族
父劉臻業也既得之則悉力營度一年而寢室成二年

而法堂立前謂不可為者稍信服矣而宗式之父朱孝
安又能捐其家貲創佛殿像設為之唱由是財施雲集
工徒日盛為堂以居僧闢廳以棲客庖廡廊廡外暨三
門無一不備初寶積院有南唐保大十一年所鑄鐘於
文為善生舊物宗式亟易以歸已而紫芝十八莖產於
雲堂僧俗懽躍贊嘆咸謂復古之祥積勤之感於茲見
矣宗式益自奮勵即其東偏起大輪藏實以經卷覆以
厦屋鐘鼓梵唄晝夜不絕遂為一鄉之名刹隆興甲申
予自龍湏過吉祥歷上邛而至於茲望其山林如百年
之積累視其棟宇有二浙之氣象為留連竟日宗式知

予之樂之也力以院記為請予雖心許未暇作也今年
復來告曰自我開此山於今五十有四年憊心疲精殫
財費工固所未論其如魔事種：備嘗艱苦年垂八十
始迄功緒記如未刻死且不瞑公烏得無情哉予曰昔
人論為政之蠹釋老常居其一今竭中人幾家之產而
成爾數十人之居為吾儒者方且膺之又何記焉宗式
曰不然古用普度之制間民無常職多寓名於帳籍幸
國大慶例得黃其冠緇其衣動以千萬計而試經若恩
澤不與焉故丁壯日耗害一也寺觀占田無藝富則千
蹊百轍規免徭役故民產又耗害二也今固異此輸金

於官乃度以牒其利一常產圭黍不可增而州縣科調時仰給焉其利二去二害得二利果可同日而語哉觀昔之佛廟道宮相望於通都大邑名山勝境之間吾徒亦溫飽衣食在處充滿何其盛也數十年來不燼於兵火則摧於風雨至有空其廬弗居者豈二氏之教始隆而終替哉勢使然爾於斯時也有能不藉公家之力不强貧窶之民易草莽之墟為金碧之坊使已墜者興已壞者成亦可以為難矣君子成人之美當在所取乎抑在所絕乎予嘉其力勞而辭直故為錄其始末使歸而刻之石淳熙元年歲次甲午十二月二十一日青原野

夫周某記

贛州寧都縣慶雲介禪師塔銘

予聞學佛者或於片言碎啄相應或終其身針芥弗投雖曰根器有利鈍亦繫其功用何如耳今夫宿植利根固易為力其如學之弗固得之弗深譬如銛錐畫沙旋開旋合大善知識每以為戒鈍者不然如椎鑽石用力雖勞會至大徹由是言之人而力學道無不至儒與釋異茲理一也始予僑居贛州識梵山長老文介嘉其樸茂勤恪類有道者因問悟入之由師為予言我年十一辭親出家十六為僧十七受戒終過來夏即遊諸方惟

茲事未竟忘寢與食瘡痍遍體抱膝危坐每聞五更鐘聲輒駭汗曰又過一日矣勤苦如此鈍不見性自從出世更覺志分若問悟入實無以對予歎曰近世升座秉拂號天人師自謂不能千百無一師非得道肯云爾耶時雖賢之顧非具眼不能測其淺深也厥後師住報恩會妙喜杲公無垢張公同時北歸士大夫日往參請師初無言說杲獨謂無垢是人所得端實不可忽也予聞斯語然後知以鈍為利者師果有焉自是益思與之遊而宦牒推移會合之日殊少去冬師有過予意方報以書而師沒矣其徒遠來乞銘且曰吾師之志也追念疇

昔敢不諾諸師福州長溪季氏子受業於本縣之西禪紹興初至潭州道吾參月菴果公尋究精專遂相契合命為侍者久之來廬陵為眾迫請住吉水龍濟山清涼禪院徙興國之梵山寧都之桃林二十一年郡守李子揚初至嚴寡與以報恩望刹廉泉在焉棟宇久隳法席不振自擇師主之贛民貧少嗇施師接以誠慤咸竭其力堂廡像設次第一新叢林成矣會齊述嬰城叛緇素宵潰師曰我去寺必墟止不動閱百二十日賊屢欲縱火加害師隨機解免舍匿士庶千計亦賴以全居十年引疾求去遂移慶雲地僻而用足異時主者自殖而已

師至則改造三門規剏殿宇理事兼舉老而彌堅嘗與
門人行西圃指尋丈曰此可營塔待我門人從之未幾
果坐亡寶乾道二年十二月十五日後八日荼毘又六
日龕焉報齡六十四坐四十七夏度弟子六人善修祖
機祖賢祖信祖元祖光嗣法五人住寧都平山彥琛福
聖道凝東山虛靜龍南東山法侑雩都羅田巖義英銘

曰

大事因緣初無二塗夫人根器乃有萬殊介者似正
其弊也拘辨者似通其弊也踈彼上人者異於斯乎
其艱其勤而實不迂其退其默而實不愚徧叅力踐
有終有初雖則云然此皆其膚畢竟何心范：太虛
我以語言拾其遺餘師豈是須尚慰爾徒

訥菴塔銘

紹興中通慧禪師法席雄盛名聞江湖間其大弟子往
徃分化他郡至其所甚愛重許為法器者不過數人太
平訥公其一也師諱惟訥福州閩清縣葛氏子幼不茹
葷家為宦族而不慕榮利年十七懇求出家父母許之
乃師事仁王寺守能師為之落髮二十一懇辭遊方初
謁雪峰真歇禪師咨叩不倦因隨眾入山失其衣韝既
而得於領中欣然覺悟遂欲徧叅禪林之有聲者以圓

宿智所向皆不契隨即捨去最後依通慧於圓通聞萬法歸一之義凝滯頓除通慧竒之時圓通為大盜所焚通慧將一新之師左右協贊厥功為多及通慧移大瀉山師與俱行其機辨日以通達遂分坐說法而通慧獨以為法器之尤者眾譽既洽於是初住衡州之雲陽禪院自號訥菴未幾移吉州龍須山之感慈及其退居始與予兄弟遊考其言行蓋夷粹端靖人也後住廬山之棲賢及圓通老而思歸乃赴九座山太平之請居之七年至乾道癸巳時師年七十有一矣十一月偶屬微疾因沐浴更衣告行於常所來往端坐說偈而逝為僧五

十四年度弟子七十三人嗣法住山者今十餘人眾以師遺骨葬於九座之西且來乞銘惟師禪學精深德量寬廓其誘接後來不為崖異而辨莫能屈故禪衲歸之又與予相識惟舊因為銘之銘曰

道大如天仁智自分禪宗末流跬步異門狹者繫拘佚者放紛小智自私本原益淪嗟維訥菴傳道粹淳明以晦將辨以訥存以通示人以戒律身順緣而歸忽焉浮雲終始若此吾寧復云

寒巖升禪師塔銘

淳熙五年

自唐以來禪學日盛方智之士往、出乎其間迹夫捨

父母之養割妻子之愛無名利爵祿之念日夜求所謂
苦空寂滅之樂於山巔水涯人迹罕至之處斯亦難矣
宜其聰明識道理胸中無滯礙而士大夫樂從之遊也
故人山陰陸務觀儒釋並通於世少許可獨與僧道升
遊敬愛之如師友予固知升不凡而恨未之識淳熙丙
申升既沒其得法弟子本高本妙聯務觀平日往來詩
書為大軸且以同郡人鄭德輿行狀及師語錄來屬予
銘其塔予未嘗學佛懵不知語錄為何等語也二士徒
以務觀之故相守經年不去予愧其勤乃為次第其說
師建寧府建安縣人姓吳母游氏初生有肉如環在其

左乳人皆異之年十四依本府龍居寺出家肉環隨隱
天資聰慧十九為僧即有遊方之志以父早世未忍捨
母：沒遂之長樂會圓悟高弟佛智禪師端裕演法於
西禪入其室言下頓悟自是機鋒迅發人莫能當佛智
移杭之靈隱師為首座佛智歸師亦還鄉初德輿結菴
於大王峰之下名曰寒巖與師有世外約至是居焉未
幾泉守以延福請師出世學者雲集會行計口法拂衣
還寒岩閉門却掃日中一食不復事：作懶散歌以見
志李敦老師闍闍諸山佛智嗣子傑出者雪峯慧忠以
師對遂住支提山又從泉守鄧成材承天之請鄧帥豫

章以師志在山林移住黃龍後帥未知公：欲去適潭帥張安國以石霜來招師兩謝焉行次西山而沈持要自漕遷師閱師退院牒即命僧徒挽留以泐潭處之寺新被焚師來施予輻輳棟宇煥然以年高懇還建安俄史丞相帥福命師主鼓山嘗謂人曰叢林荒寒人物委靡此事將如馬鞭節漸尖去矣益以佛法自任結夏後一日忽問侍僧今日何日僧曰十六日師曰非也是何日辰僧曰辛卯師即集眾索紙書偈擲筆而化神色如生後三日葬全身於寺南香爐峯壽七十九僧臘六十六凡六住大刹所至五年本高類其說法偈頌語要行於世讀者當自得之銘曰

古之英材一出儒術降及後世或隱於釋惟寒岩師所立瑰竒有辨其才有勇其為生也何心雲族雨潤逝也何往雲散天淨我不識師亦未學禪姑妄言之然乎不然

靈隱佛海禪師遠公塔銘

淳熙五年

師姓彭氏名慧遠眉山人先世儒業父寧母宋氏師年十三因其兄從釋氏問曰欲何為乎兄曰求解脫耳師曰然則我亦可為也願與兄偕父母許之事藥師院僧宗辨問質所疑辨察其異語之曰吾不用你侍奉也其

往叅叢林度有成而歸吾猶未老也即祝髮走成都習
經論學於大慈寺留四年乃遊諸方叩請甚衆復還峨
嶺靈岩寺依黃龍南公之孫徽禪師兩歲若有所悟徽
可之翼日即告行同志挽留不聽曰師以為可而吾終
未釋然也聞闡悟勤禪師住成都昭覺造烏一日闡悟
普說師豁然有得仆於衆中衆掖起之乃曰吾夢覺矣
至暮與闡悟問答無滯闡悟大喜以偈贈師有奮鐵舌
轉關捩之語衆目為鐵舌遠自此機鋒峻發率常屈其
上首紹興乙卯春眉守延居象耳山不赴是歲闡悟去
世嘆曰哲人云亡繼之者誰乎乃扁舟下峽初抵淮南

住龍蟠山壽聖寺一年遷琅邪山之開化又移婺之普
濟侍郎蘇伯充一代耆德日與師談論俄徙嚮之定業
時妙喜杲公謫梅州有傳師偈頌往者妙喜駭曰老師
暮年有子如此也因以書寄法衣逮其歸相遇甚懽妙
喜極口稱譽之自是人益歸重俄徙光孝閱十年安定
郡王趙表之侍郎曾天猷俱為世外交後過南嶽住南
臺有龍玉璉方廣行皆月菴高弟道行湖湘竊相謂曰
此間壁立萬仞遠將何所置足乎又聞其議論超詣始
大嘆服璉率其屬環拜曰此膝不屈於人久矣未幾過
天台歷住護國、清鴻福三寺乾道丁亥沈尚書德和

守平江以虎立比不得人力邀師至則接物無倦戶外
屨滿緇素悅服名達闕下五年有詔住高亭山崇先寺
六年遂開堂於靈隱賜號佛海禪師惟聖上神曜得道
虛心應物屢召師入內相與問答而其道益尊明年夏
有日本僧覺阿通天台教乘頗工書能道諸國語初來
謁師氣甚銳師徐以禪宗曉之覺阿留三年作投機五
頌而去他日因海商附其國園城寺主者覺忠詩書來
謝其為遠人所敬如此淳熙二年閏九月旦師上堂說
偈言數十句末云相喚相呼歸去來上元定是正月半
都下喧傳而疑之師有弟曉林亦出家且得法於師方

住國清至是招以來若有所屬明年感微疾果以上元
安坐而化龕留十日顏色不變是月二十五日葬烏峰
之塔壽七十四僧臘五十九後事實林主之傳其道又
有了宣齊已了乘師王元靖紹鴻如本尼法真皆住大
刹云某始識師於虎立晚乃見之靈隱愛其辨而有宗
峻而能通故樂與之語師既葬而林數以銘為請且曰
吾師遺言也久之乃為銘曰

禪有頓門無言為宗世或待喻假言以通惟其善鳴
譬之雷風言而非言以開群聾猗與遠師心傳大雄
如應響谷如待問鐘既得其承龍象影從明詔再錫

又彰其逢發明正宗推折妄庸法席屢遷道契九重
於古有光為譽益崇順緣而歸自昔所同明月攝影
浮雲無蹤我為銘詩刻劃太空如彼戲論記其初終

省齋文稿卷第四十終

